

吉林通志



吉林通志卷三十

食貨志三

田賦下

官莊

吉林官莊五十處額地一萬五千二百四十八晌三

畝壯丁三百四十六共納倉糧一萬一千一百九十

七石四斗五升

吉林外紀七吉林官莊五十處壯丁五百名每壯丁地十二晌共地六千

晌每壯丁交倉石糧三十石共交糧一萬五千石官

牛三百條內歲應倒斃牛六十條買補倒斃每牛價

銀各六兩七錢共應領銀四百零二兩嗣因連年被

災收成歉薄每年應交糧石不足額數嘉慶十七年

將軍賽冲阿奏准將應徵丁糧以一萬六百八十石

作為正額交納二十一年將軍富俊奏准官莊五十

處莊丁五百名內除逃故丁一百五十四名現有丁

三百四十六名共計官地及旗民私開毗連之地一



萬五千二百四十八畝按地之肥瘠統按上中下等則徵收共計得糧一萬一千一百九十七石四斗五升合各丁赴倉交納校前定額一萬六百八十石之數多增糧五百一十七石四斗五升以後每年只領一半倒斃牛價銀已足敷用每年可節省銀二百零一兩查出法特哈邊門外三道卡薩哩閑荒招佃開墾取租以補缺額似有認領之人卽行陞科起租俟能敷原額一萬五千石之時再行具奏

三道卡薩哩官莊地二千八百八十二畝三畝內納

糧折徵制錢地一千四百七十二畝七畝每畝徵市

石糧六斗共徵糧八百八十三石六斗二升合倉石

糧二千二百九石五升照定章每石合制錢四百六

十文共折徵制錢一千十六吊一百六十三文納租

折徵制錢地一千四百九畝六畝每畝徵市錢六百

六十文共折徵制錢四百六十五吊一百六十八文
又應納公倉額糧地一百二十晌七畝每晌納市石
糧六斗三升共七十六石零四升一合合倉石糧一
百九十石一斗二合五勺

甯古塔官莊十三處壯丁一百三十名原額地一千
五百六十晌每丁交倉石糧三十石其交糧三千九

百石 吉林外紀七每壯丁地十二晌官牛七十八條
內歲應倒斃牛十六條買補倒斃每牛價銀各
六兩七錢共應領銀
一百零七兩二錢 八旗十二佐領每佐領下承

種官十九畝二分共地二百三十畝四分應納穀五
百七十六石入義倉存貯

嘉慶五年覆准從前甯古塔地十二佐領及驛站官
莊地二萬七千四百八十六畝五分每年應徵銀九
百餘兩年來生齒日繁又值連年霜雹旗人無力耕
種之地甚多內未經拋荒地八千二百九十二畝五
分仍留該兵爲業已拋荒地一萬九千一百九十四
畝給民耕種俾課項有著旗人不致受無地之累但
小民初墾備辦牛具籽糧勢難納賦俟明年秋後升
科經此次調劑之後或旗兵漸見豐饒民人或不耕
種仍隨時奏請撥歸旗兵以符舊制

會典事例一
百四十一

伯都訥官莊三處壯丁六十名原額地七百二十晌

共交穀一千八百石

吉林外紀七每壯丁十二晌官牛三十六條內歲應倒斃牛七

條買補倒斃每牛價銀各六兩七錢共應領銀四十六兩九錢

三姓官莊十五處乾隆四十五年設壯丁一百五十

名地一千八百晌共交公倉穀四千五百石每石加

耗糧三升共收耗糧一百三十五石

吉林外紀七每壯丁地十二晌

官牛九十條內歲應倒斃牛十八條買補倒斃每牛價銀各六兩七錢共應領銀一百二十兩六錢乾

隆八年置義倉地四百五十晌由十五牛象耕種共

納倉穀七百二十石 八旗十二佐領每佐領下承

種官地十九畝二分共地二百三十畝四分應納穀

五百七十六石入義倉存貯

阿勒楚喀拉林官莊六處壯丁六十名乾隆二十一

年

六字據通志

原額地七百二十晌共納倉糧一千八百

石

吉林外紀七每壯丁地十二晌官牛三十六條丙

歲應倒斃牛七條買補倒斃每牛各價銀六兩七錢共應領銀四十六兩九錢

烏拉官莊五處曰尤家屯張家莊子前奇塔穆屯後

奇塔穆屯蜂蜜營屯莊頭五名隨差地十五晌壯丁

一百四十名熟地共二千一百七十五晌每丁種地

十五晌徵糧四十五斛共徵糧三千二十四石耗糧

在外 涼水泉官莊地一萬四千晌額徵租錢八千

四百貫津貼總管署喀薩哩官莊地一千七百晌額

徵租錢八百貫津貼各官莊差務

冊報

道光二十年將軍經額布薩炳阿奏言道光十三年

欽奉

諭旨寶興等奏請將墾荒租息分撥賞給以資津貼一摺烏拉涼水泉開墾荒地據查明共地七萬三千九百餘晌著准其二道河以東撥出二萬晌以七成賞給烏拉總管衙門三成賞給協領衙門招佃收租爲津貼獎賞之費餘五萬三千餘晌著作爲官荒如需撥用再行奏明辦理該將軍卽責成該營隨時嚴查儻有私行侵佔惟該總管協領是問嗣於二十年閒因查出弊竇經署將軍惟勤參奏欽

奉

上諭交臣經額布查明究辦查總管署原撥地一萬四千晌
浮多七千四百五十晌共開成熟地一萬一千九百
十九晌八畝九分未墾地九千五百三十晌一畝一
分協領署原撥地六千晌浮多五千九百十六晌共
墾熟地四千九百五十六晌二畝二分未墾地六千
九百五十六晌七畝八分并留公所荒地七百六十
五晌又查出月段擅撥瑪琿官莊地一千晌浮多二
十三晌已墾塾地六百七十二晌未墾地三百五十
一晌均分別擬議參奏並請將已未墾熟之地以花

圍山廟座爲界交與伯都訥同知管轄分別收租催墾責成稽察其租仍照舊章每晌大小租市錢六百六十文大租分給兩署津貼市錢一萬二千貫其餘充餉嗣經奉部議准唯徵租一節部議以新成局地畝暫歸旗民開墾豫備雙城堡移駐京旗撥地之用是以議租甚輕至伯都訥民地例定每畝徵銀八分米四合四勺二抄有奇較新城局輕重懸殊今涼水泉原墾及丈出餘地旣准各佃領種納租便爲民業與新成局實有不同應令遵照例定民地科則徵收等語查看涼水泉一帶本係砍山所出之荒全屬偏

坡砂瘠間有平坦之處非屬沮洳卽係薄土冷漿訪
詢民佃情形歲種一季若遇雨水冲刷或降霜較早
卽無收穫以常年論上地畝可收糧一石者次地不
過三斗且初開地時兩署告示每晌收租錢六百六
十文永不加增今甫墾熟若議加租民心不懌而勢
畏重租餘荒難期墾足伏思涼水泉地係寶興等奏
奉

諭旨賞給烏拉兩衙門津貼獎賞之費租之多寡原可聽其
自行辦理其始招佃放地給照認墾定以六年起租
每晌大小租京錢六百六十文永不加增本與舊章

相符嗣因辦理不善致有越界貪展之弊不得不加懲創究之貪展在官而官已參辦民佃無辜實與私墾之案迥不相同如遵部議加租是以

恩賞招墾之地而責民佃以私開之咎名義旣屬不符且不免失信於民似有未便前奏請將此地交附近之同知經管係爲彼旣辦理不善後恐仍踵前轍故交同知徵租招佃認墾可以稽察無弊非一經交廳卽爲民地夫官招民佃遇有拖租事故撤地另佃一作民地則輾轉典賣胡可底止蓋此項

恩賞之地若旗丁自種可以作爲已業而佃種之民戶則

斷不准據爲恆產也現經派員訪查地薄不宜增租
更張殊有空礙並據同知周懋勘明其處係伐木所
出之荒土性瘠薄尙不及民糧下則之地原租每畝
制錢三十三文已較下則民地爲多應請仍照墾荒
舊章免其加租現僅開成熟地一萬六千八百七十
六畝一畝一分暫由同知經徵儘數按三七成分給
兩署津貼短墾地三千一百餘畝責成同知招佃補
墾俟補足二萬畝津貼全租市錢一萬二千貫以符

原

賞之案其瑪琏官莊熟地六百七十二畝同一瘠薄亦照

原租徵收撥兌兵餉報可

摺檔 按總管署報冊僅載津貼地一萬四千晌而

協領署地六千晌未及或漏略也他處亦無可徵考姑存疑

旗田

吉林本城八旗蒙古營烏鎗營旗地共十八萬四千

五百三十六晌二畝 水師營旗地五千九百七十

五晌三畝

冊報

官兵隨缺地

協領九員每員地六十晌

參領一

員地六十晌

佐領五十六員每員地四十晌

四

品官二員每員地四十晌

主事二員每員地四十

晌 防禦二十六員每員地三十晌

五品官二員

每員地三十晌 總站官二員每員地三十晌 助
教官二員每員地三十晌 筆帖式四十九員每員
地三十晌 驍騎校五十六員每員地三十晌 六
品官四員每員地三十晌 領催三百二十四名每
名地二十晌 前鋒七十九名每名地二十晌 兵
三千二百七十四名每名地十六晌 共地六萬七
千七百三十四晌

檣案

道光二十年

諭內閣惟勤等奏吉林將軍有食租地六十八晌副都統有
食租地二十四晌無案可稽等語此項地畝著卽賞給吉

林將軍副都統作爲隨缺之地以資辦公

銘安奏言吉林爲我

朝根本重地協佐以下各官皆係滿蒙世僕或爲勳勞
後裔襲職當差或曾效力軍營回旗揀補溯自咸豐
二年征調頻仍官弁兵丁效命疆場者十居七八生
還故里者十僅二三其戶口之彫零室家之窮苦有
不忍形諸奏牘者若以昕夕奔馳之苦復有衣食內
顧之憂不惟政體有虧抑且廉隅難飭卽如協領應
領俸銀一百三十兩扣成折放每年僅得實銀六十
五兩佐防以次遞減一切公私費用均在其中實係

入不敷出難免賠累臣任盛京刑部侍郎時詢知奉天旗員兵丁均有隨缺地畝分防協佐尙有優缺足資養贍卽在省當差輪派河倉亦可均霑餘潤而吉省地處邊陲異常瘠苦旣無優異之缺亦乏調劑之差是以從前派令旗員等查丈荒地徵收錢糧及一切雜差無不擾累地方藉端需索追呼培克習爲故常以致民怨沸騰累累控告光緒二年臣奉

命來吉查辦事件半由於此然原情而論出於貪婪者總少迫於窮困者實多自_臣抵任後凡有差委辦撥閑款酌給川資不准藉差科派若蹈前轍立予嚴參邇

來旗員等尙知奉公守法較前已覺改觀但每月僅得俸銀數兩一身之用度尙覺不敷數口之饑寒更難兼顧貧困所迫難保不見利忘義故態復萌今吉省添設民官劃疆分治廉俸辦公均已奏准開支而旗員等除俸銀外別無津貼與民官所入大相懸殊未免稍分厚薄第當庫儲支絀之時萬難籌給公費惟查嘉慶咸豐年間前將軍富俊固慶等先後奏准雙城堡自總管以下官兵撥給隨缺地畝道光年間前將軍倭什訥奏准伯都訥自副都統以下官兵撥給隨缺地畝其三姓地方臣前會同督辦大臣吳大

徵於光緒六年十月間奏請副都統以下俱撥給隨
缺地業經仰蒙

聖鑒在案其餘省城各旗員均未奏請撥給同一竭蹶從
公而隨缺地畝或有或無殊覺苦樂不均今伊通等
處奏明派員開放生荒上中之田人皆呈領餘地近
山磽薄恐難保租一時難以招佃若將此地撥作隨
缺官田雖收成歉薄亦可略資辦公除各城副都統
等前經臣奏准蒙

恩賞給津貼足敷應用及伯都訥雙城堡三姓等處旗員
已有官地均毋庸議撥外所有吉林十旗烏拉伊通

額穆赫索羅甯古塔琿春阿勒楚喀拉林五常堡等處擬請援照雙城堡成案撥給協領隨缺地畝每員八十晌佐領五十晌防禦四十晌驍騎校三十晌筆帖式五十晌領催前鋒每名二十晌如蒙

俞允請俟各處放荒事竣查明未墾地畝共餘若干應如何分撥再當妥議章程奏明辦理至額設甲兵所領錢糧照章折放本屬無多而各項差徭向係攤派苦累情形尤爲可憫若一律請給荒地恐不敷撥容俟放荒完竣再行設法矜恤以紓兵困

經世文續編三十四時部

議未卽允准銘安亦謝事去遂不果行比光緒十八

年長順奏言光緒七年間前將軍銘安奏請將開放
伊通等處所餘近出磽薄無人承領地畝援照成案
撥作隨缺官田旋奉部覆覈與成案請撥地數不符
應令覈實刪減並將各城旗員名數請撥地數及開
放伊通等處生荒上中磽薄之田各有若干除撥隨
缺官田外餘贖若干分晰造冊送部再行覈辦嗣經
前將軍希元派員查明伊通等處放給佃民承領納
租界內共地六萬五千三百餘晌均係挨連勘放中
無曠閒地段此外靠南接界雖有未放磽瘠生荒南
北數十里之間盡係深山磊石並無可出之地若再

向南開展卽屬白山封禁地界又多關礙自委員繪圖稟覆後希元以無荒地可撥故未奏辦臣到任以來每遇春秋閱操揀放缺分目覩官兵窘累光景復爲周諮博訪所稱困苦原委均與銘安原奏符合若不及時培養將來旗僕凋敝情形勢必每下愈況不堪設想現除伯都訥雙城堡二城外近惟三姓官兵五常堡副甲兵等有此隨缺地畝而各屬自奉部駁至今虛懸同一困苦而或有或無未免過形枯菀卽原奏並未議及甲兵亦屬疏漏臣等因遵照部咨詳加覈減或二十晌或十晌不等無可減者仍照原案

又甲兵每名各予地十六晌計省城十旗水師營額設職官制兵等共需地六萬七千七百三十四晌請由伊通州經徵圍荒納租地六萬五千三百六十九晌七畝四分儘數劃撥不敷地二千三百六十四晌二畝六分擬由吉林府經徵之省西圍荒納租地內照數撥補其烏拉協領管下伊通額穆赫索羅佐領管下暨甯古塔琿春二城額設官兵並五常堡職官等應得隨缺地共五萬二千一百六十四晌擬由吉林府經徵之舒蘭土門子納租地內劃撥阿勒楚喀官兵應得地一萬六百五十二晌擬由賓州廳經徵

之蜚克圖站池東納租地內劃撥拉林官兵應得地
九千晌擬由雙城廳經徵之東官佃板子房等處納
租地內劃撥俱歲收租銀給爲津貼合無仰懇

天恩俯念吉林官兵歲得俸餉減成折放加以攤扣旗佐
差費公用所餘無幾實屬苦累異常請

飭下部臣議准照撥以資辦公而示體恤如蒙

俞允卽請自光緒十八年爲始嗣經部議所擬數目暫准
由徵租地內撥給仍應遵照奏案只准撥銀不准撤
佃永爲定章一面將通省閑荒勘丈如敷撥給卽將
所撥租賦撤回抵餉仍令官兵自行墾種以符成案

案檔

甯古塔八旗田五萬九千一百二十五晌

文移

官兵隨缺地

協領二員每員地六十晌

佐領十

二員每員地四十晌

防禦八員每員地三十晌

筆帖式十四員每員地三十晌

驍騎校十二員每

員地三十晌

領催七十一名每名地二十晌

前

鋒三十七名每名地二十晌

兵一千二百零八名

每名地十六晌

共地二萬三千一百零八晌

案檔

伯都訥八旗田三萬九千四百七十二晌

文移

官兵隨缺地道光三十年將軍倭什訥副都統盛桂

奏將廳屬東珠爾山東西閒荒撥給每晌歲收租錢
五百文 協領二員每員地四十晌 佐領二十員
每員地三十晌 防禦八員每員地二十五晌 驍
騎校十二員每員地二十五晌 雲騎尉三員每員
地二十晌 恩騎尉二員每員地二十晌 無品級
筆帖式領催前鋒披甲兵役等共一千一百七十二
名每名地十六晌 共地一萬九千七百九十二晌

副都統
署文移

三姓八旗田六萬三千三百九十二晌

文移

官兵隨缺地光緒六年將軍銘安督辦大臣吳大澂

奏准撥給 副都統地一百八十晌 衙署公用地

二千晌 協領二員每員地八十晌 佐領十六員

每員地五十晌 防禦八員每員地四十晌 驍騎

校十六員每員地三十晌 筆帖式十二員每員地

五十晌 領催九十五名每名二十晌 前鋒四十

名每名二十晌 兵一千三百六十五名每名十六

晌 共地二萬九千八十晌

冊報

琿春八旗田一萬一千五百九十三晌

文移冊報

官兵隨缺地 協領二員每員地六十晌 佐領八

員每員地四十晌 防禦四員每員地三十晌 筆

帖式八員每員地三十晌 驍騎校八員每員地三十晌 領催四十名每名地二十晌 前鋒七名每名地二十晌 兵五百六十名每名地十六晌 共地一萬九百四十晌

檔案

阿勒楚喀八旗田九萬八千六百四十晌零三畝

文移

官兵隨缺地 協領二員每員地六十晌 佐領八

員每員地四十晌 防禦九員每員地三十晌 筆

帖式十三員每員地三十晌 驍騎校八員每員地

三十晌 領催三十六名每名地二十晌 前鋒八

名每名地二十晌 兵五百二十七名每名地十六

响 共地一萬零六百五十二响

檔案

拉林八旗田六萬四千九百一十二响九畝六分

文移

官兵隨缺地 協領一員地六十响 佐領八員每

員地四十响 防禦五員每員地三十响 筆帖式

五員每員地三十响 驍騎校八員每員地三十响

領催三十六名每名地二十响 前鋒八名每名

地二十响 兵四百五十名每名地十六响 共地

九千响

檔案

打牲烏拉四界旗田東南路熟地一萬七千三百餘

响 東北路熟地一萬七千二百餘响 西南路熟地八

千三百餘晌西北路熟地一萬五千二百餘晌共地

五萬八千餘晌

冊報 文移作五萬
千七百九晌一畝六分

烏拉協領八旗田一萬九千三百二十九晌二畝

文移

官兵隨缺地

協領一員地六十晌

佐領八員每

員地四十晌

防禦四員每員地三十晌

筆帖式

二員每員地三十晌

驍騎校八員每員地三十晌

領催四十六名每名地二十晌

兵六百五十一

名每名地十六晌

共地一萬二千一百三十六晌

檔案

雙城堡八旗田十五萬一千一百四十五晌四畝六

分文
移

官兵隨缺地道光元年將軍富俊奏准撥給原設有
總管一員地一百六十晌兩翼委協領二員地各三
十晌無協領光緒八年將軍銘安奏裁總管改設協
領並裁兩翼委協領餘多地一百四十晌歸廳署徵
租 協領一員地八十晌 佐領八員每員地五十
晌 防禦二員每員地四十晌 驍騎校八員每員
地三十晌 左右司開缺繙譯筆帖式二員每員地
五十晌 筆帖式領催甲兵二百九十二員名地各
二十晌 共地六千七百四十晌

協領署
文移

協領署額徵旗丁承種納租滋墾毛荒八千晌三項
旗地六萬七百三十七晌六畝一分又站丁承種滋
墾浮多地二百一十五晌凡徵大租銀一萬九百七
十一兩四錢六分九釐八毫小租銀一千九十七兩
一錢四分六釐九毫八絲大租銀抵充俸餉小租銀

作催徵人役經費

冊檔

五常堡二旗田三千六百五十七晌八畝四分

文移

職官隨缺地 協領一員地六十晌 佐領二員每

員地四十晌 防禦二員每員地三十晌 筆帖式

三員每員地三十晌 驍騎校四員每員地三十晌

共地四百一十晌 檔案按甲兵隨缺地
係先設者今未開報

伊通二旗田一萬三千二百八晌 文移

官兵隨缺地 佐領二員每員地四十晌 防禦二

員每員地三十晌 驍騎校四員每員地三十晌

領催十二名每名地二十晌 兵一百八十八名每

名地十六晌 共地三千五百零八晌 檔案

額穆赫索羅一旗田七千九百六晌五畝 文移

官兵隨缺地 佐領一員地四十晌 防禦一員地

三十晌 驍騎校一員地三十晌 領催六名每名

地二十晌 兵一百十四名每名地十六晌 共地

二千四十四晌

檔案

伊通邊門所屬七臺旗田一萬三千五百六十晌

赫爾蘇邊門所屬八臺旗田一萬七千七百三十六

晌六畝八分七釐 佈爾圖庫邊門所屬七臺旗田

五千七百四十五晌一畝 巴彥鄂佛羅邊門所屬

七臺旗田一萬一千三百晌六畝

文移

金珠鄂佛羅管下二十二站共地四萬八千六百五

十五晌 烏拉額赫穆管下二十站共地六萬三千

三百六十一晌

冊報

巴彥鄂佛羅

原作巴言俄佛洛

邊門七臺種地共二千四百

零六响伊通

原作一統

邊門六臺種地共一千四百五十

六响赫爾蘇

原作爾素河

邊門八臺種地共九百三十响

佈爾圖庫

原作布爾圖庫蘇巴爾漢

邊門七臺種地共一千二百

八十九响烏拉

原作叭喇

站蒐登

原作蘇通

站伊勒門

原作一而門

站刷煙站伊

原作一

巴丹站阿勒坦額墨勒

原作阿爾坦額墨爾

站赫爾蘇

原作爾素黑

站葉赫

原作夜河

站蒙古河洛站共九

處種地共七千九百六十响金珠鄂佛羅

原作金周俄佛洛

站舒蘭河

原作書蘭

站法特哈

原作他哈法

站登伊勒哲庫

原作

登格爾哲庫

站蒙古站陶賴昭

原作討來

站遜扎保

原作扎波

站

浩色

原作蒿子

站社哩

原作舍力

站伯

原作北

都訥站額赫穆

原作

額和 站拉法站退搏原作推吞 站額穆赫索羅原作俄莫和索洛

站必爾罕畢喇原作畢爾漢必拉 站沙蘭站甯古塔站共十

七處種地一萬零六百四十三晌八旗通志二十一

嘉慶二十一年

諭據松甯等奏站丁藉地當差今因私相典賣若將各站丁地畝普行勘丈每名留給十餘晌俱入官徵租丁力拮据請仍其舊等語此事並著富俊悉心覈計應如何派撥均勻俾各有力當差不致私行典賣妥議章程具奏

又

諭富俊奏覈議吉林站丁地畝章程一摺吉林站丁私將地

畝典賣若將該丁等地畝普行勘丈每名僅留給十晌餘
俱入官徵租丁力必驟形竭蹶著仍照松甯原議循舊辦
理至查出典賣與民地一萬三千五百六十三晌五畝著
照富俊所議均勻賞給額設站丁八百五十名每名十五
晌九畝零卽作爲隨缺工食養贍津貼其當差窮苦站丁
各按典賣之民種滿十年照該村屯租地寬減二成給該
丁納租不准該丁奪地另佃如民抗不交租照例撤地交
站丁自種嗣後如再有越界私墾及私相典賣者丁民俱
一體治罪地價全行入官以示懲儆

附前代田賦考

稅布五疋穀五石游人則三年一稅十人共細布一

疋租戶一石次七斗下五斗

北史高句麗傳

遼太宗會同二年十月以烏爾古部水草豐美命謬

爾昆錫林居之以海勒水之善地為農田

續文獻通考一

金太宗天會九年命以圖們水以西和搏錫馨珊沁

三水以北閑田給海蘭路諸穆昆

金史本紀三

熙宗天眷元年詔罷拉林水混同江護邏地與民耕

牧金史本紀四

世宗大定二十三年七月命推排上京諸路牛具數

續文獻
通考一

金制官地輸租私田輸稅租之制不傳大率分田之
等爲九而差次之夏稅畝取三合秋稅畝取五升又
納秸一束束十有五斤夏稅六月止八月秋稅十月
止十二月爲初中末三限州三百里外紓其期一月
章宗泰和五年以十月民穫未畢不可遽令納稅改
秋租限十一月爲初上京地寒稼穡稽遲熟夏稅限以
七月爲初凡輸送粟麥三百里外石減五升以上每
三百里遞減五升粟折秸百稱者百里內減三稱二
百里減五稱不及三百里減八稱三百里及輸本色

藁草各減十稱
上同

...

...

...

...

...

...

...

...

...

...

吉林通志卷三十一上

食貨志四

屯墾

吉林府 省東舒蘭墾地五萬六千四百三十六晌
五畝八分 咸豐十一年奏請開墾舒蘭迤北土門
子禁荒光緒十二年勘明納租地三萬九千七百八
十三晌六畝三分丈出浮多地一萬六千六百五十
二晌九畝五分七年升科

省西圍場邊荒八牌內墾地八萬八千七百九十八
晌二畝七分五釐 咸豐十一年奏請開墾省西圍
場邊荒光緒十二年勘明東四牌博文篤行誠忠允

信四社納租地二萬三千零五晌二畝五分六釐丈
出浮多地一萬一千八百一十六晌九畝九分九釐
七年升科西四牌耕讀勤儉敦厚崇禮四社納租地
二萬九千五百七十四晌四畝二分丈出浮多地二
萬三千六百二十八晌五畝八年升科又續行文出
允信社浮多地一百八十八晌六畝九分八年升科
博文社浮多地五百零七晌五畝九年升科篤行社
浮多地二十五晌二畝九分十一年升科篤行社生
荒五十一晌六畝二分十五年升科

省南漂河樺皮甸子墾地九千七百六十二晌六畝

五分 此荒先經金場流民私墾八百餘晌同治五年奏准給予流民認種輸課光緒三年勘明納租地五千七百二十三晌四畝四分丈出浮多地四千零三十九晌二畝一分六年升科

省南烏林溝墾地一千九百一十一晌一畝九分

此荒與樺皮甸子同時開墾光緒十二年勘明納租地一千五百一十五晌三畝丈出浮多地三百九十五晌八畝九分七年升科

省西圍場荒溝河墾地二萬三千九百九十九晌七畝一分八釐 同治七年奏請開墾光緒十二年勘

明納租地一萬四千七百二十六晌一畝零二釐丈
出浮多地九千一百三十一晌八畝三分六釐八年
升科又續行文出浮多地一百四十一晌七畝八分
九年升科

伊通州 光緒七年放出熟地二十三晌九畝本年
升科生荒地二千七百一十一晌七畝二分 八年
放出熟地二千零三十一晌六畝一分本年升科生
荒地五萬二千四百一十二晌八畝八分 又撥放
吉林義學經費熟地六十九晌五畝本年升科生荒
地一千三百晌零零三畝一分 九年放出熟地二

十七晌一畝九分本年升科生荒地五千三百六十

六晌二畝八分 又撥放吉林義學經費熟地六晌

五畝本年升科生荒地七千二百零五晌五畝二分

十年放出熟地二十七晌一畝九分本年升科生

荒地五千三百六十六晌二畝八分

按以上荒地光緒十年奏准

除原放熟地並生荒內已墾熟地屈限升科其未墾生荒均自光緒十六年升科

敦化縣 光緒五年放出熟地二千七百七十四晌

八畝九分本年升科 六年放出熟地一百七十晌

本年升科 七年放出熟地三十七晌五畝本年升

科 八年放出熟地十四晌五畝本年升科 原放

生荒內已墾熟地九千九百七十七晌三畝九分光

緒十三年升科未墾生荒地一萬九千五百九十八

晌八畝八分十五年升科 新放敖東懷德城山沙

鎮四鄉荒地四百九十三晌四畝光緒十八年升科

伯都訥廳 新城局八號荒墾地十六萬零六百七

十晌零一畝四分 道光四年奏准開墾伯都訥間

荒十萬八千晌二十七年查出私墾珠爾山地八千

餘晌蘊梨場以西代吉屯一帶地一萬一千餘晌光

緒十三年勘明納租地共十二萬八千三百七十八

晌一畝二分丈出浮多地三萬二千二百九十二晌

零二分口年升科

珠爾山墾地二萬一千三百一十九晌四畝 同治

六年奏准開墾珠爾山間荒光緒十四年勘明納租地一萬四千七百一十九晌六畝九分丈出浮多地六千五百九十九晌七畝一分口年升科

蘊黎場墾地一萬二千四百八十六晌六畝一分

咸豐十年奏准開墾蘊黎場閒荒光緒十四年勘明納租地九千九百三十八晌四畝三分丈出浮多地二千五百四十八晌一畝八分口年升科

北坎下墾地三千二百六十晌零八畝九分 開墾

年分未詳光緒十四年勘明納租地二千三百一十二晌八畝七分丈出浮多地九百四十八晌零二分
〇年升科

八里荒墾地三萬四千晌零零二分 道光十九年
查出北路驛站私開八里荒地畝擅作津貼撤地入
官徵租光緒十四年勘明納租地二萬七千六百七
十六晌二畝二分丈出浮多地六千三百二十三晌
八畝〇年升科

隆科城墾地四萬四千三百四十七晌四畝八分

同治五年奏請開墾隆科城閒荒光緒十四年勘明

納租地三萬七千六百四十二晌一畝九分三釐三毫丈出浮多地六千六百六十二晌三畝六分六釐七毫口年升科續行文出浮多地四十二晌九畝二分十二年升科

五常廳 夾信溝涼水泉墾地十一萬七千四百零九晌四畝四分九釐 咸豐五年奏准開墾夾信溝涼水泉荒地光緒十四年勘明納租地十萬零三百八十九晌七畝七分九釐丈出浮多地一萬七千零十九晌六畝七分口年升科

雙城廳 滋墾地四萬五千九百五十二晌一畝一

分 咸豐十一年奏請開墾雙城堡贍荒光緒十四
年勘明納租地四萬四千五百四十四晌七畝二分
丈出浮多地一千四百零七晌三畝九分〇年升科
毛荒墾地八千一百六十一晌九畝六分 開墾年
分無考光緒十四年勘明納租地七千八百六十五
晌七畝丈出浮多地二百九十六晌二畝六分〇年
升科

八千晌納租墾地八千九百五十二晌零零二分道
光二十四年奏准開墾雙城堡近屯荒地八千餘晌
光緒十四年勘明納租地八千七百七十三晌八畝

丈出浮多地一百七十八晌二畝五分〇年升科

恒產夾界內墾地九千六百四十二晌零五分 咸

豐元年奏准以恒產夾界內墾成之地九千餘晌勻撥原佃陳民輸租光緒十四年勘明納租地八千七百六十晌零九畝八分丈出浮多地八百八十一晌零七分〇年升科

民人周榮滋先後墾地九百九十晌零六畝九分

開墾年分未詳光緒十四年勘明納租地八百六十八晌丈出浮多地一百二十二晌六畝九分〇年升

科

裁撤總管委協領隨缺地光緒十四年勘明納租地
一百四十晌九年升科

拉林所屬墾地二萬八千九百四十晌零九畝 開
墾年分未詳光緒十四年勘明納租地二萬八千七
百五十一晌三畝二分丈出淨多地一百八十九晌
五畝八分八年升科

贖存圈荒墾地二萬三千八百九十一晌二畝七分

咸豐十一年奏准開墾拉林贖存圈荒光緒十四
年勘明納租地一萬七千二百九十九晌五畝八分
丈出淨多地六千五百九十一晌六畝九分八年升

科

板子房墾地四千零零八晌九畝八分 開墾年分
未詳光緒十四年勘明納租地二千五百三十二晌
六畝八分丈出浮多地一千四百七十六晌三畝八
年升科

賓州廳 瑪琿河光緒五年放出生聚教養四牌內

佃戶墾成熟地二千七百五十五晌五畝一分本年
升科又放出生荒內已墾熟地四千三百五十九晌
九畝二分十年升科未墾生荒九千零五十七晌一
畝九分十三年升科又續放餘荒地二千零零六晌

四畝一分十三年升科

阿勒楚喀所屬蜚克圖站迤東圍場閒荒柳樹河子
甬子溝三清宮二道河子大石頭河涼網等處墾地
十七萬六千二百五十五晌三畝七分 咸豐十一
年奏准開墾光緒十一年勘明納租地八萬四千零
三十五晌八畝一分丈出浮多地九萬一千五百五
十八晌三畝三分

甯古塔 三岔口墾地一萬二千四百餘晌 光緒

七年奏請招民開墾旋設威遠社居仁社由義社講

禮社興讓社十八年造冊報部

穆稜河墾地六百餘晌 光緒十一年於穆稜河一

帶招民開墾十八年造冊報部

琿春 光緒七年奏准墾成琿春地方熟地五千六百二十晌零一畝六分設立春和社春芳社春華社春明社春融社春陽社

南岡地方於光緒七年墾成熟地一萬八千九百三十九晌九畝三分設立志仁社尙義社崇禮社勇智社守信社明新社

五道溝地方於光緒七年墾成熟地三千零七十三晌九畝六分設立春仁社春義社春禮社春智社春

信社

黑頂子墾地一百四十四晌三畝五分 光緒十三

年調靖邊營兵試辦屯墾十六年撤兵以地給民

安遠堡屬韓民墾地四千二百四十五晌九畝二分

甯遠堡屬韓民墾地五千二百八十一晌五畝三

分 鎮遠堡屬韓民墾地二千二百一十四晌三畝

七分

光緒四年將軍銘安片奏再查阿勒楚喀所屬瑪琿

川地方兩面大山橫寬數十里自北面山口直達南

山綿亘二三百里其中土地沃饒開墾幾遍從前以

險峻難通未經查禁遂致民聚愈眾其頭目宋土修以信義約束民皆墾地捕牲無敢爲匪該民目等雖無擾害地方而聲教不通竟同化外若不妥籌安撫養癰成患甚屬可虞臣等派兵搜山該民目恐干查究赴吉勝營軍前呈請丈地升科等情前來查瑪琿川民目宋土信旣無擾害地方情事亦無爲匪案據自應一視同仁乘機化導又阿克敦城一帶亦有私墾地畝前經派員履查據該旗民各戶呈墾領業升科並願補交荒價等情現在賊氛漸息亦應將私墾地畝查丈升科妥籌善後事宜臣等現派候選知州

書瑞總辦瑪琿川地畝事務督同各員將荒熟各地
逐段勘丈熟地給原墾認領荒地招民承墾均卽編
造戶口清冊以憑查核又派知縣趙敦誠等前往阿
克敦城亦將旗民私墾地畝查明造冊均令分別荒
熟限年升科至蘊黎場展拓之地前已奏奉

諭旨准民認領現飭候選通判王紹元前赴蘊黎場會旗
勘立封堆再將所展之地勘丈給照一切章程亦接
此次定章辦理以期畫一

光緒七年將軍銘安等奏竊查吉林伊通以南爲圍
場再南爲奉天圍場又南始爲山獸滋生之所自奉

天放荒後人烟日稠山獸遠避斷不能越境而至吉林園場每逢捕打

貢鮮竟無所獲聞其地多沃壤可資開墾飭據知府李金鏞等履勘稟稱南荒東自蘇密西至青頂子其間高原平壤錯立山中者計有二十七處約可墾地十餘萬晌如與由奉劃回吉林之地一律招墾實於民業餉源均有裨益等情稟請核辦前來臣等伏念園場原爲採捕今山獸不至未便如前封禁况由奉劃回之荒民墾已久一旦驅逐必致流離若分別或放或封徒滋居民偷種之弊合無仰懇

天恩俯念吉省南荒圍場無可採捕准其援照奉省請放
圍場成案一律招佃認領墾種以安民業而裕餉源
如蒙

俞允再由 臣等派員辦理

光緒十六年總理衙門奏查原奏內稱朝鮮流民佔
墾吉林邊地光緒七年經前任將軍銘安督辦邊防
事宜吳大澂奏准將該流民查明戶籍分歸琿春及
敦化縣管轄嗣因朝鮮國王懇請刷還流民咨由禮
部轉奏經該將軍等覆准予限一年由該國地方官
設法悉數收回復因限期已滿該國仍不將流民刷

還反縱其過江侵佔經前任將軍希元咨由總理衙門奏准派員會勘乃該國始誤以豆滿圖們爲兩江繼誤指內地海蘭河爲分界之江終誤以松花江發源之黃花松溝子有土堆如門附會土門之義執意強辨仍由總理衙門奏明覆勘續經希元派員勘明石乙水爲圖們正源議於長水分界繪具圖說於十三年十一月奏奉

諭旨欽遵咨照該國王遵辦在案乃該國王不加詳考遽信勘界使李重夏偏執之詞堅請以紅山水立界齟齬難合然未便以勘界之故遂置越墾爲緩圖現在

朝鮮茂山府對岸迤東之光霽峪六道溝十八歲子
等地方韓民越墾約有數千地約數萬晌此處既有
圖們江天然界限自可毋庸再勘該國遷延至今斷
難將流民刷回應亟祇遵前奉

諭旨飭令領照納租歸我版籍先行派員清丈編甲升科
以期邊民相安等語

臣

等查吉林朝鮮界務前經兩

次會勘所未能卽定者特茂山以上直接三汲泡二
百餘里之圖們江發源處耳至茂山以下圖們江巨
流乃天然界限江南岸爲該國咸鏡道屬之茂山會
甯鍾成慶源慶興六府地方江北岸爲吉林之敦化

縣及琿春地方該國勘界使亦無異說韓民越墾多年廬墓相望一旦盡令刷還數千人失業無依不特情寔可矜急切亦無辦法若聽其以異籍之民日久佔住主客不分殊非久計且近年該處墾民疊以韓官越界征租種種苛擾赴吉林控訴經北洋大臣李鴻章咨臣衙門有案誠如原奏所云韓員剝削民生之苦流民服我賦稅之輕是其心悅誠服安上重遷已可概見現在江源界址旣難剋日劃清則無勘辦處所似宜及時撫綏以慰流氓歸附之心臣等與李鴻章往復函商意見相同擬請

飭下該將軍遴派賢員將清丈升科各事宜妥爲經理因
俗施教務令相安毋任操切滋事所有領照納租歸
各地方官管轄一切詳細章程應由該將軍體查情
形奏明試辦

吉林通志卷三十一下

食貨志四

屯田下

雙城堡屯田

嘉慶十七年四月初二日奉

上諭八旗生齒日繁京城各佐領下戶口日增生計拮据雖經添設養育兵額而養贍仍未能周普朕宵旰籌思無時或釋前日舉行大閱典禮各旗營隊伍整齊在南苑先期訓練祇遵約束朕嘉旗人服習教令更念養先於教爲之謀衣食者益不可不周國家經費有常舊設甲額現已無可復增各旗閑散人等爲額缺所限不獲挑食名糧其中

年輕可造之材或閑居坐廢甚或血氣方剛游蕩滋事尤爲可惜因思東三省原係國家根本之地而吉林土膏沃衍地廣人稀聞近來柳條邊外採獲山場日漸移遠其間空曠之地不下千有餘里均屬膏腴之壤內地流民並有私侵耕植者從前乾隆年間我

皇考高宗純皇帝軫念八旗人衆分撥拉林地方給與田畝俾資墾種迄今該旗人等甚享其利今若仰循

成憲斟酌辦理將在京閑散人陸續資送前往吉林以間曠地畝撥給管業或自行耕種或招佃取租均足以資養贍將來地利日興家計日裕旗人等在彼儘可練習騎射其

材藝優嫻者仍可備挑京中差使於教養之道實爲兩得
著傳諭賽冲阿松甯卽查明吉林地方自柳條邊外至採
蘆山場其間道里共有若干可將採蘆場界址移近若干
里自此以外所有間曠之地悉數開墾計可分贍旗人若
千戶並相度地勢如何酌蓋土銜草房俾藉棲止其應用
牛具籽種每戶約需若干再該處現有閑散官員是否足
資統束抑或須增設佐領驍騎校之處一併詳細妥議章
程並繪圖貼說具奏候朕酌度此事經營伊始該將軍等
毋得畏難觀望務盡心籌畫以副委任將此諭令知之欽

此尋將軍賽冲阿奏

臣 欽奉

諭旨卽派員弁先往吉林甯古塔距城附近地方查勘緣生
齒日繁近地十里內外早經該處旗人零星開墾亦
無成片之區是以檢查舊案祇有拉林間荒未墾奏
案聲明往勘酌辦現勘拉林東北閒荒一處自鞍子
山至桶子溝約可墾五千餘晌拉林東南夾信子溝
一處約可墾二萬餘晌雖距阿勒楚喀城四十餘里
至五十里不等而新駐之旗人究難令隔遠之副都
統專管恐不足以資約束乾隆年間初辦拉林移駐
之時曾添設副都統大員在彼專司稽察彈壓嗣於
三十四年裁汰自乾隆九年籌辦起至十九二十五

等年始行移駐就緒非數年即可歲事近來吉林各屬收成不豐屢荷

恩旨賑卹蠲緩尤於籌辦移駐之事不甚相宜應請

旨將此項拉林閒荒暫行緩辦容臣等從容熟商妥議於三

五年後查有豐熟之年再行奏辦奉

上諭賽冲阿等奏踏勘拉林可墾閒荒地畝一摺據稱勘得拉林東北有閑荒一處可墾五千餘晌又有東南夾信子溝一處可墾二萬餘晌該兩處距阿勒楚喀四五十里不等恐移駐旗人該副都統難以約束並稱近來吉林各屬收成不豐請俟三五年後從容籌辦等語又另摺奏請將

三道卡薩里閑荒地畝撥補吉林官莊壯丁除撥給外其餘閑荒不許旗民侵佔每年秋收後請令該管官親往查勘以杜私墾等語移駐閑散旗人以裕生計今旣勘明拉林附近有可墾地二萬五千餘晌而三道卡薩里地方除撥補官莊之外仍有閑荒可墾是該省未經墾種曠土甚多與其每年派人前往查管何如一併籌畫使旗人前往耕種俾收地利而成恒產至拉林荒地離城雖四五十里移駐旗人耕作與按期演習騎射者不同亦不必專在近郊如從前拉林專設副都統稽查旋卽裁汰至今該處旗人久安生業亦無庸專設大員就近約束若謂該處近年

收成不豐此時原不能卽將旗人移駐其一切墾荒計畝章程則須預爲籌辦不必延至三五年後推諉時日著該將軍等卽檢查乾隆年間移駐舊案將先期試墾備辦各事宜詳細酌核先行籌議章程具奏候旨遵行會賽冲阿調任成都未及舉辦將軍富俊蒞任後於十九年十

一月十四日奏言

臣

檢查舊卷移駐京旗蘇拉蓋房

墾地均藉吉林各城兵力趕辦其地但墾而不種雖酌留數人教耕一年裁汰新移京旗蘇拉往往不能耕作始而顧覓流民代爲力田久之多爲民有殊失

我

皇上愛育旗人之至意此時預籌試墾莫若先期屯田通盤
合算應請先於吉林所屬無業閑散旗人內令各旗
共揀丁一千名出結保送作爲屯丁每丁由備用項
下給銀二十五兩官爲置買牛具自行搭蓋窩棚由
阿勒楚喀公倉內賞給籽種穀二石每年給補倒斃
牛價銀一千三百三十六兩於前勘定拉林東南夾
信溝地方每名撥給荒地三十晌墾種二十晌留荒
十晌試種三年後每晌交穀糧一石計自第四年起
交糧貯倉十餘年後移駐京旗蘇拉時將熟地分給
京旗八十五晌荒五晌所餘熟地五晌荒五晌卽給

原種之屯丁作爲恒產免其交糧亦不補給倒斃牛
價如此因利而利並不多糜國帑吉林窮苦旗丁獲
沐

殊恩卽將來京旗蘇拉移駐到吉得種熟地與本處旗屯衆
丁犬牙相錯易於學耕夥種殊於移駐有益所有屯
田出入各數及設官管理章程十條並屯丁用款繕
單呈

覽一種地屯丁千名應設官彈壓及辦理一切事件擬設委
協領一員總司其事由吉林十旗佐領內揀選調補
其佐領缺卽令無兼佐領之協領署理由防禦內揀

選二員作爲委佐領每員各管一翼由委官及世職七八品監生內選擇二員作爲委驍騎校隨佐領辦理一翼屯丁事件呈委協領由委協領核轉詳報阿勒楚喀副都統衙門辦理咨報將軍衙門防禦並無專司之事毋庸補設如挑委官所出之缺仍食原餉仍由領催前鋒內挑補至委協領佐領驍騎校管理屯丁千名應請照委更換頂帶以資彈壓食原俸餉一委協領佐領處應設辦事應役之人委協領處擬給領催二名甲兵二十名委佐領處每翼領催二名甲兵十五名領催甲兵共五十六名卽在吉林五十

六佐領下每佐領各出一人充補以上均作爲該處額缺一委協領管理有方除墾荒外初次三年屯丁全交糧石卽補吉林協領以後定以五年全交糧石卽補吉林協領所出之缺由委佐領內揀補委佐領出缺由委驍騎校內揀補所出之缺由六名領催內挑補以示鼓勵並資熟手其領催之缺由五十名甲兵內挑補以上各項如不得人仍由吉林各旗佐領防禦監生委官內揀選補放一馬甲挑補領催事故出缺以該兵之子弟並八旗屯達內揀選充補一屯丁出缺由伊弟兄子姪內挑補俾所種地畝可作恒

產不致視爲傳舍潦草從事四丁合一具應令四人
互相結保如有逃懶等事同具互保人應卽報明仍
挑伊子姪弟兄充補不得藉詞有廢耕作致悞交糧
一委協領等官初到無所棲止委協領擬給房十間
佐領各給房八間驍騎校各給房六間領催六名各
給房四間甲兵五十名各給房三間以上共房二百
一十二間每間給價銀十兩聽其自行建蓋居住官
爲建蓋辦事公所草正房三間草廂房三間大門一
座土院圍墻一道共估需銀二百二十兩以上共用
銀二千三百四十兩只給一次一委協領等官初到

口糧新紅紙張不無需費協領一員擬給荒地四十
晌佐領二員擬各給地三十晌驍騎校二員擬各給
地二十晌領催六名擬各給地十晌甲兵五十名各
給地八晌以上共合地六百晌以省動項均作爲隨
缺官地永遠不隸典當滋弊一屯種八旗應按左右
翼分方立屯鑲黃正黃每旗屯丁一百二十八人合
牛三十二具其餘六旗每旗屯丁一百二十四人合
牛三十一具每旗設立五屯每屯設十家長二人屯
達一人五屯設總屯達一名俱由屯丁內揀選充補
以資約束有事稟官辦理一委協領佐領有呈報一

切事件請給委協領關防一顆及左右翼佐領圖記
二顆以昭信守一第四年開徵每年收穀二萬石應
修蓋倉廩合貯二萬石穀數來春卽照市價每石減
銀一錢出糶價銀卽解吉林銀庫另款存貯以備將
來移駐旗人蓋房等項使用俟開徵之頭年另籌建
蓋至於屯田用款計屯十四名合牛一具用牛四條
每條價銀八兩共合銀三十二兩喂牛黑豆每牛每
日二升三月起至八月止共六箇月喂黑豆十四石
四斗每石價銀一兩共合銀十四兩四錢喂牛草每
牛每日四束六箇月共合草二千八百八十束每束

合銀三釐共合銀八兩六錢四分窩棚一間合銀四兩并一眼合銀二兩四錢三十人合一眼犁杖一付合銀五錢鏵子二條合銀六錢犁碗子一箇合銀五錢千斤一付合銀四錢懷扒信子一箇合銀二錢五分鋤頭四把每把合銀四錢共合銀一兩六錢鐮刀四把每把合銀一錢二分共合銀四錢八分鏤頭一把合銀四錢大斧子一把合銀四錢鐵鍬一把合銀二錢石碓子一箇合銀一兩七錢礮一盤合銀二兩碾子一盤合銀四兩車二輛每輛合銀三兩二錢四分共合銀六兩四錢八分鋤刀一把合銀一兩八錢

大鋸一把合銀二錢七分銚子一把合銀三錢鑿子
一把合銀一錢九分大礮石一塊合銀五錢口袋四
條每條合銀四錢共合銀一兩六錢鐵鍋一口合銀
一兩五錢大缸一口合銀四錢盆子一套合銀二錢
五分碗四箇合銀八分盤子二個合銀六分蓆子一
領合銀三錢白布四疋每疋一兩五錢共合銀六兩
叭喇四雙每雙合銀二錢共合銀八錢口糧二石每
石合銀二兩五錢共合銀五兩以上共合銀一百兩
每丁合銀二十五兩又屯種擬用銀糧合計十年出
入總數查種地屯丁每名買牛置買農具一切給銀

二十五兩屯丁千名計用銀二萬五千兩只給一次
耕牛一千條照官例牛六條每年准倒斃牛一條計
一年倒斃牛一百六十七條每條價銀八兩共合銀
一千三百三十六兩初年不給以九年計合銀一萬
二千零二十四兩屯丁千名共賞給籽種穀二千石
每石作價銀六錢共合計銀一千二百兩只給一次
協領等官以及兵丁蓋房二百一十二間每間給價
銀十兩又蓋辦事公所房七間合銀二百二十兩共
合銀二千三百四十兩以上共合用銀四萬零五百
六十四兩屯種十年初墾三年不交糧石第四年起

徵每丁交穀二十倉石屯丁千名一年應交穀二萬石計七年共交穀十四萬石每石約計價銀五錢十四萬石共合銀七萬兩除十年除用銀四萬零五百六十四兩外計餘銀二萬九千四百餘兩再種十年只用倒斃牛價銀一萬三千三百六十兩得穀二十萬石合銀十萬兩除補牛銀外仍餘銀八萬六千六百餘兩奏入其月二十六日奉

上諭據富俊等奏預擬試墾章程並將屯田出入各數屯丁用款開單呈覽此項試墾地畝需帑無多將來開墾成熟後移駐京旗閑散與本處旗屯眾丁錯處易於學耕夥種

不致僱覓流民代耕啟田爲民佔之弊其單內合計十年用銀四萬零五百兩其試墾之第一年祇須銀二萬八千餘兩卽可興辦著卽照所議挑選屯丁一千名由該處備用銀兩內撥給牛價等項公倉內撥給穀種如法試墾富俊現准來京陛見著松甯先行經理俟富俊回任後一切會同妥辦此事創行伊始務須計畫周詳督率各屯丁勤習耕作並隨時認真稽察如一年辦有成效則積至十餘年後所得租穀糶價大可裕旗人生計若仍令僱民代墾或將地畝私行租佃久之悉爲流民佔據將來移駐旗人時無地可耕則該將軍等辦理不善咎有攸歸斷不寬恕

其所議按年徵租及派撥官兵約束一切章程均著照所
議辦理欽此二十年富俊奏言臣等請將拉林夾信溝閑
荒揀丁屯種試墾各事宜仰荷

恩允臣

於四月初六日帶同各委員前往詳勘查原勘之荒
地雖沃衍大勢窪下前勘時詢悉秋深草茂未能辨
別試墾創始必須詳慎隨復往阿勒楚喀拉林之西
北八十里之雙城子一帶東西約有一百三十餘里
南北約有七十餘里地土平坦洵屬沃衍可備移駐
京城閑散旗人二三千戶之用揀查舊檔乾隆四十
三年前任將軍福康安具奏繪圖進呈奉

旨知道了此事交軍機處存記緩辦欽此臣當卽在此地適

中之處暫行駐札派令各委員週圍履丈分撥通計
四丁四牛之數俾得同力合作核算成屯每旗設立
五屯鑲黃正黃二旗每旗住屯兵一百二十八戶計
住二十四戶者三屯住二十八戶者二屯其正白正
紅鑲白鑲紅正藍鑲藍六旗每旗住四十四戶者四
屯二十八戶者一屯共滿洲屯兵一千名每戶房基
東西寬二十丈南北長二十丈屯丁寬用九丈留十
一丈以補將來留住京旗蓋房之用每屯房分三路
住二十八戶屯東西寬計用二百丈住二十四戶屯

東西寬計用一百六十丈南北長俱六十丈每屯街
道寬五丈巷一條寬三丈共估用六十八丈除房基
街巷外每屯丁核計荒三十大晌各按左右翼附屯
分撥至東西左右翼之界中建蓋公所及協領住房
左右翼官住房各領催兵房悉照奏款留基之外分
給官兵隨缺荒地仍在公所附近留建倉地基計共
用見方三十四里所用一切農具先已飭交同知採
買成造現於勘定處所開井相度水道應用耕牛一
千隻派員前往邊外採買分起趕緊赴墾所總須本
年補齊給丁先爲運木割草搭蓋窩棚使用採取木

植卽由莫勒拉林河上游砍運請於明春一律間段
開墾飭令該管官督察勤惰催耕該屯丁等自必感
激

天恩漸有成效所有現勘試墾之拉林西北雙城子卽名爲
雙城堡並咨行阿勒楚喀副都統派委協領各官設
立封堆繪圖呈報存案五月十四日奉

上諭富俊等奏詣勘分荒試墾事竣一摺拉林西北雙城子
一帶地土沃衍經富俊親往查勘派員履丈現擬每旗設
立五屯共屯丁一千名一切農具耕牛等項已分別採買
於本年備齊明春一律開墾並據繪圖進呈朕詳加披覽

所擬闕屯試墾章程尙爲周妥著照所奏辦理該將軍等
惟當隨時督察認真經理以期漸有成效至摺內稱現在
所勘之地可備移駐京城閑散旗人二三千戶之用該將
軍等前奏稱自試墾第四年交糧起七年交穀十四萬石
每石約價銀五錢可得銀七萬兩除十年用項外餘銀二
萬九千餘兩十餘年後卽可以移駐京旗閑散等語著該
將軍等於試墾收糧辦有成效後察看可以移駐京旗之
時毋庸奏請同時並往當酌定起數如移駐一千戶分爲
數年陸續前往庶辦理較有次第資遣亦易爲力也將此
通諭知之欽此二十一年富俊奏言臣等於去年奏請於

吉林等處閑散旗人內揀選一千名賞給牛具籽種口糧撥往雙城堡每人給地三十晌令其墾種三十晌於二十四年起徵每晌交納穀糧一石出糶之價預備移駐京旗蘇拉之用仰蒙

俞允當卽揀委官兵購買牛隻籌辦農具口糧揀派旗丁五

百名赴山砍木搭蓋窩棚以備今年耕作其餘五百名於今春二月遣赴雙城堡令其開墾屯種去後據

該員委協領明保等屢報屯丁脫逃_臣等嚴加究問

據各供稱丁等本皆窮苦所有屯田牛條農具一切均係官爲備辦丁等並未得有分文拮据難度是以

逃出在外傭工圖得現錢並因妻子在家無養繫念
衣破乏人縫補逃回是實委無別情等語臣等查各
旗出派屯兵多係窮苦無業間有不肖之徒習慣惰
懶當卽剴切曉以

聖恩使安分者得有生計之路其違令擅逃者分別嚴懲另
行補派督催上緊耕作緣今春雨少地乾開墾費力
合計本年每丁只各開地一晌餘至二晌不等幸夏
秋雨水調勻所種禾稼暢茂正在有望豐收不意阿
勒楚喀拉林雙城堡等處於七月十四五日連降大
霜禾稼受凍臣卽親赴拉林阿勒楚喀雙城堡一帶

查勘拉林阿勒楚喀雖被霜較早籽粒欠實幸麥秋
豐稔合計收成尙有五分餘勘不成災惟雙城堡係
初開生荒又無麥收顆粒空虛合計收成止有四分
已屬成災所打穀糧僅敷當年糊口明春尙須接濟
且無力另僱長工不能多開地畝合無仰懇

聖恩請將二十四年起徵之年糧遞緩一年展於二十五年

徵收明春在於阿勒楚喀倉貯穀石內借給口糧籽
種二千石責令秋收後照數還倉以資接濟再

臣親

赴八旗各屯查驗畝丁跪懇僉稱丁等四人合牛一
具賞銀四兩搭蓋窩棚一間無人做飯看家應開地

多不能四人同力耕作茲將家口帶來房不能容丁
等又皆無力自蓋叩求每人賞給窩棚一間俾將妻
子接來看家做飯有人亦免牽挂無妻眷者僱工幫
墾亦有棲所得以盡力開墾不致悞課等語

臣

詳細

體察係屬實情查原議四人一具給銀四兩蓋窩棚
一間四人同住實不能接取家口甚至屢逃於屯種
無益若每人各給一間屯丁千名除前已給二百五
十間外仍須添蓋七百五十間每間銀四兩計共用
銀三千兩卽於庫存備用銀內動支計種十年糶穀
之價足敷歸補所動原款奏入奉

上諭富俊等奏雙城堡開墾地畝被霜一摺已明降諭旨照所請施恩矣雙城堡地方本係生荒經富俊奏請開墾適被霜災業已量爲調劑但該將軍摺內有屯丁報逃另行補派之語該處初經開墾氣候早寒屯丁等一切俱未熟悉試種二三年歲有收穫自可以漸加墾闢儻其地實不宜於種植徒勞無益卽當據實奏明另行籌畫不可固執已見以奏准在前意存廻護也尋富俊奏言臣伏查雙城堡地屬平原黑土實爲膏腴之區是以相度區畫核定章程奏蒙

俞允洵爲八旗窮丁生路兼可預植移駐京旗之根基第係

初墾生荒未免費力新撥屯丁間有窮乏習慣懶惰
乘便脫逃並非地不可耕雙城堡地方與拉林伯都
訥接壤寒暖較吉林不相上下昨臣富俊前往履查
見勤苦耕作者積草儲糧頗有熙皞氣象當卽酌賞
獎勵僉稱荷蒙

皇上厚恩賞給美地窩棚牛具農器口糧纖悉皆備雖父母
愛子未必能如是周全其懶惰偷安以及脫逃之丁
隨時具報責懲分別更換補額訪得寔情遂有添蓋
窩棚暨支借籽種糧石之請現叨

鴻慈恩准並寬限起徵則稍有天良務本者計地生財固日

臻起色卽最苦畏縮者亦必有所觀感效法趨公家
計漸裕矧所撥之地毫無沙窪三四年後定成樂土
臣斷不敢以預畫久遠之計而作一時廻護之思以
致將來窒碍難行轉爲後來接事者藉口地步惟是
生荒初墾較之熟地用力原屬天淵適遇霜災糧粒
不齊故在附近已熟之地勘不成災而在生荒甫墾
之區未免減色疏入報

聞二十二年富俊調任

盛京將軍復奏言八旗數十萬衆聚集京師不農不賈
皆束手待養於官勢不能給再四思維惟有移駐屯

田因天地自然之利使自耕種爲養方資久遠之計
因查雙城堡尙有荒地二分未墾擬於

盛京吉林八旗無論滿蒙漢軍各項旗人內挑丁二千
名置買牛條器具刨挖井眼搭蓋窩棚於二十五年
春正月前往墾種名爲雙城堡左屯右屯將前屯處
所名爲中屯其一丁一牛竭力耕作一年止能種地
十晌必須丁力稍裕加僱牛條長工方能開足二十
晌中屯所墾之地請於二十五年先徵十晌糧石其
餘十晌再緩二年至二十七年升科以裕丁力新墾
之地二十八年升科先徵十晌糧石其餘十晌請於

三十年一律升科除建蓋房間外其餘一切均照初次設立章程畫一辦理共屯丁二千名每一丁搭蓋窩棚一間應用牛隻器具等物合銀二十兩共需銀六萬兩屯田官兵住房辦事公所共計房三百二十間應需銀一萬一千二百兩每年支給補買倒斃牛價銀二千六百七十二兩外發給一年籽種倉穀四千石以上統計需銀七萬三千八百七十二兩卽在吉林庫存備用銀內動支若俟糶穀之價歸款需時較久請在吉林及奉省獲餘項下先行陸續歸款至移駐京旗不必盡待糶穀價銀辦理二十八年起每

年移駐二百戶爲一起每戶用蓋房銀一百二十兩
由京起程賞給治裝盤費銀三千兩雙城堡置買牛
糧器具銀五十兩每起共用銀四萬兩暫由吉林備
用銀內動支由雙城堡糶穀價銀吉林奉省積餘銀
內歸款每戶給車一輛由順天府僱送至奉省照數
補辦轉送至雙城堡車價均照例報銷計十五年卽
能陸續移駐三千戶該蘇拉等各得田產安居樂業
內可分八旗戶口之繁外可聯邊城鞏固之勢擬給
官兵心紅隨缺荒地數目及每戶應給房地牛條器
具分則開單呈

覽奉

旨著交松箴詳查妥議具奏俟定議後再行會同富俊辦理
將軍松箴議奏每丁添給砍木衣履搬家遷費車輛
並按年給與種地接濟銀兩奉

旨富俊現已調任吉林將軍著將松箴所議章程再交富俊
覆加核擬松箴所定銀數是否豐儉各宜屯丁得此是否
卽可養贍家口盡心開墾務期國帑可以按限歸補不致
多糜而於旗民生計亦寔有裨益方爲經久良策富俊奏
言詳核松箴所議添給砍木盤費衣履並遷費銀兩
前未籌及似應增添奉天金州復州等處至吉林雙

城堡將及二千里窮丁自力前往誠有不逮每丁擬給遷費銀八兩其吉林各處至雙城堡不過二三百里亦擬給銀八兩未免遠近漫無區則吉林屯丁每名應給銀四兩又請添給每丁車一輛查莊農人家多係一車二牛服駕一具四牛前已給車二輛足敷使用似可無庸再行添給至升科旣請照旱地第六年徵租該屯丁等已有花利不必按年給與種地間荒接濟銀兩以重帑項而昭核實以上每丁核計需銀四十七兩零四分五釐其奉省撥派官四員遠赴雙城堡每員請給遷費銀十二兩領催兵四十名每

名遷費銀八兩吉林撥派官四員領催卡兵四十名
應照奉省減半給與前設中屯屯丁多未攜眷請給
遷費銀四兩其餘無庸增減建蓋新添二屯屯田官
兵住房辦事公所共三百二十間應需銀一萬一千
二百兩買補屯田兩分倒斃牛價預買之年二千頭
內卽間有倒斃請於開墾之年支給以十年合計需
銀二萬六千七百二十兩連前開中屯荒地屯丁遷
費一分共需銀四萬六千三百六十兩統共三分荒
地以十年合計共需銀十七萬八千九百二十六兩
三分荒地自升科徵租起算每年得穀六萬石每石

照奏定原價減銀一錢以四錢爲準出糶計至十年
可得穀價銀二十四萬兩較前動支數目有盈無絀
至現動銀兩帑項攸關不可久懸請於吉林積餘項
下按年抽收先行歸補計十年所得穀價另存備用
至開墾徵租年分委協領佐領等改補實任裁撥兩
省官兵增給鹽菜薪紅砍木蓋房等事均請照松綵
所擬及臣前議章程辦理應用各款銀數繕單呈
覽皆下部議行時二十四年二月十六日也富俊尋奏言

接奉

諭旨卽派員先赴雙城堡分丈左右一屯地基並咨

盛京將軍將應撥雙城堡左右二屯閑散千名並彈壓
佐領二員驍騎校二員領催甲兵四十名內均照奏
定章程先酌派佐領驍騎校各一員領催二名甲兵
十五名帶領閑散五百名於四月內由奉省起程五
月初一日以內至雙城堡飭令蓋搭窩棚安置棲止
以備次年墾種其應給遷費銀兩咨行

盛京戶部就近在該處發給並咨禮部鑄給雙城堡改
爲寔任協領關防中左各三屯六翼佐領圖記開寫
官兵住房辦事公所房間式樣派員發給銀兩購材
趕緊修蓋以備官兵到時棲止又發交理事同知銀

兩照奏定款單置買一切器具驗妥運交雙城堡協領佐領等查收以便屯丁到屯發給派員前往黑龍江採買耕牛二千頭限於九月內趕赴雙城堡牧養以備次年春融耕墾臣隨於九月間攜印親往查勘一切就緒並發給每丁棉衣棉褲宣誦

皇恩深渥俾衆丁咸知勸勉力田云云又請以原任甯海縣知縣竇心傳照直隸廢員辦理營田之例令其前赴吉林雙城堡勸課屯丁三年期滿照例送部引

見奏入

允之竇心傳者山西人嘉慶辛酉科進士改庶吉士散館授

知縣選任江西新淦調豐城丁憂起復揀發奉天題
補甯海縣知縣奏署承德縣二十三年以承修

陵差道段泥濇被參革職富俊知其有才有守故特薦之遂
調取到吉委令勸課屯丁籌議一切屯務二十五年
春奏言新立左右二屯所撥

盛京吉林旗丁一千名均已到屯派員前任同該翼佐
領按名分交地一段三十晌並令於開墾時計地二
段橫直俱留六尺荒隔一條以備開齊地畝秋收拉
運禾稼毋得任其連段開墾日後致啟爭競並繪圖
劄令該管協佐領等分交各丁云云五月復奏言

臣

於嘉慶二十三年奏准在

盛京吉林各項旗人內挑選蘇拉二千名開墾雙城堡
左右二屯荒地隨於二十四年咨取

盛京旗丁五百名酌撥旗丁五百名前往砍木蓋房

盛京旗丁五百名內多有親族隨來幫同工作因見此

處田地肥美紛紛呈懇情願來屯墾種核計吉林各

城丁數酌撥甯古塔之蘇拉往往潛逃詢因甯古塔

山深林密該蘇拉等多藉打獵爲生彼處地亦肥美

可耕不願輕離鄉土亦係實情

臣

隨將甯古塔蘇拉

全數送回咨明

盛京將軍於該省情願前來墾地旗人內多挑蘇拉二百餘人以補甯古塔蘇拉遺缺不必拘定一千之數嗣經該將軍挑選足數隨同本年應來蘇拉五百名陸續咨送到屯卽以甯古塔蘇拉繳還遷費銀兩發給毋庸增添其餘吉林各城蘇拉亦據各該旗佐具報如數攜眷赴屯在案臣巡查各城完竣由拉林就近赴雙城堡二屯挨次逐旗查勘旗丁等比屋環居安土樂業合具者多係一旗同屯者半屬姻親犬牙錯壤鱗次分疆頗有井田遺風該旗丁等莫不扶老攜幼跪誦

皇仁臣諭令孝弟力田安靜守法卽所以仰答

天恩隨至中屯履畝查勘麥苗已皆長發正值播種之期男

耕婦饁俱極勤勞臣皆酌加獎犒回環周歷千數百

里經十三日而始畢謹將分撥二屯地畝段落繪圖

貼說並籌議數款附片恭呈

御覽奉

硃批滿洲故里佃田宅宅洵善事也欽此又奏言三屯應增

條款五事一每屯應添井一眼以裕食用也臣原奏

試墾雙城堡屯田每三十丁井一眼每四丁合銀二

兩四錢嗣因每旗設立五屯每屯二十四丁二十八

丁不等挖井一眼率合二十五戶一眼仍以每四丁
二兩四錢之數合算每井一眼工料銀十五兩三屯
挖井一百二十眼共用銀一千八百兩惟中屯撥往
旗人僅止一丁帶領本身妻子井水尙敷食用今設
左右兩屯

盛京撥來屯丁每戶父子兄弟男婦多者十五六口少
者亦七八口不等詢知此處地甚肥美多願跟來充
作帮丁現在該丁等自行添蓋窩棚居住每屯多至
一二百人加以官給耕牛並飲自畜驢馬往往不敷
日用嗣後生齒漸繁移駐京旗亦須添挖現在中屯

管理屯丁三千戶詞訟案牘紛繁兼隨關防請照璉
春之例協領處添設無品級筆帖式二員中左右三
屯佐領處各添設無品級筆帖式一員辦理一切案
件協領處並請添設委官二員中左右三屯佐領處
各添設委官一員以資差委稽察各屯事件均於領
催甲兵內擇其通識清漢文字者補放筆帖式照例
准支米石各食本身錢糧毋庸另行增給其委官並
不支領米石仍食本身錢糧一總屯道應給虛銜工
食以資彈壓也

臣

原奏每旗設立五屯每屯設立十

家長二人屯達一人五屯設立總屯達一人原令其

約束屯丁查報滋生戶口及倒斃耕牛並年滿催納糧石戶衆人繁彈壓非易且遇事應赴公所呈報均須盤費毫無鼓勵徒多差使人皆視爲畏途請照拉林之例總屯達各

賞戴金頂外每人月給工食銀一兩共二十四人一年共用銀二百八十八兩遇閏增給銀二十四兩亦在舊餘項下動支報銷一賞銀應准由管理三屯協領處支存以示體恤也臣原奏三屯設立領催十六名甲兵一百二十名遇有婚喪事件例得

恩賞銀兩向係臨時本佐領呈報該協領申詳副都統轉咨

臣衙門給咨未免稽遲不能濟急准其支領銀三百兩存貯中屯協領公所由協領就近照例給領催隨時呈報查核統於年終造送冊結彙辦每年除去用項仍補足三百兩之數令該協領每季將實存之數出具印結以杜挪用侵食之弊奏入皆

允之又

諭曰富俊於吉林開墾屯田一事銳意辦理今雙城堡所墾地畝已有成效盛京閑散旗丁視爲樂土紛紛呈請願來耕種其續行籌議條款亦俱周妥洵屬實心任事富俊著交部議敘欽此議上又

議給予紀錄二次不足以示優獎著賞加一級欽此

富俊尋奏言

臣

屢飭雙城堡協領佐領督催開荒種

熟原任知縣寶心傳挨屯確查勸課左右二屯新撥
屯丁均各安靜樂業惟中屯屯丁內間又有搬移家
眷及攜農器脫逃者查明無眷者催令該旗派兵送
屯俾令完聚脫逃者令該旗佐領挑補有眷旗丁送
屯嘉慶十九年初奏設立諸多從簡每丁合銀二十
五兩四丁窩棚一間嗣復奏明每丁賞給窩棚一間
遷費銀四兩器具內如缸鍋鋤鍬等項均須四人一
分現各接取眷屬勢不敷用連年豐收糶賣穀賤無

力添補查有歸補屯田項下獲餘銀二萬四千餘兩
請以二萬兩分交殷實舖商每月一分生息酌量添
補中屯屯丁器具五年歸還原款每年用項取具雙
城堡協領等冊結印領送部核銷以歸核實人少不
能多種牛少不能多開地畝三屯屯丁雖皆攜帶家
眷弟男子姪在屯幫作均無力添買牛條仍不能多
開地畝議於節省備存銀內動用銀一千一百三十
七兩六錢咨令伯都訥副都統派員採買乳牛二百
四十條分給三屯種地多有幫丁之屯丁喂養俾資
利耕以裕孳生小牛酌賞種地多之屯丁中屯於嘉

慶二十一年設立除因霜災展緩一年應於道光二年起徵租左右二屯嘉慶二十五年添設應於道光五年起徵相三屯旗丁三千名每名穀二十倉石每年共徵租六萬石來春出糶自道光四年起每年移駐二百戶每戶除由京賞給治裝盤費銀三十兩外其蓋房一百二十兩置買牛條器具銀五十兩暫由吉林備用銀兩項下動支以抽收穫餘及糶穀價銀陸續歸款不致虛糜帑項道光二年砍木備料三年修蓋二百戶住房八百間四年正月移送閑散二百戶每戶閑散應給房地牛條器具及添設官兵建蓋

公所一切章程繕單具奏奉

旨富俊奏自道光四年爲始每年移駐京旗二百戶分爲四起送屯該處預於道光二年伐木築室按戶給與房間每畝牛具盤費等項逮及織悉並移駐後添設官兵蓋房給地及該官兵升調挑補各事宜其計畫甚爲周備均著照所議辦理其摺單著發交八旗滿洲蒙古都統副都統等各曉諭所屬旗人使知遷移之樂願移駐者各報明本旗屆期咨送授產力田以厚生計不得以桀驁不馴之人充數致擾淳風各該旗仍將報明之戶咨報戶部每屆年終先行具奏一次欽此道光元年正月富俊又奏言

臣

安設

左右二屯旗丁二千戶安立章程屯丁俱各安業所
有砍木相度地勢蓋房招募商人就近立窯燒造甃
瓦及赴屯開鋪造辦器具以省運費種種一切均須
籌議調度尙賴寶心傳經理懇將寶心傳知縣原銜
開復以示鼓勵俾有頂戴辦理一切較爲得力俟移
駐京旗安妥後送部引

見

允之又奏言雙城堡官兵擬給隨缺地畝原爲俾資當差但
地因隨缺該官兵等無力開墾亦難強使必行至令
空有隨缺之名不得地畝之益查乾隆十三年大學

士公訥親等議覆

盛京將軍達爾黨阿奏隨缺地畝章程每地十晌給牛
一牯估銀九兩置買犁鏵等項估銀一兩共用銀七
萬餘兩在生息銀兩利銀內加展扣還在案所有三
屯地畝協領一員八十晌佐領六員每員五十晌驍
騎校六員每員三十晌領催十六名甲兵一百二十
名每名二十晌以上本地官兵一分共三千二百八
十晌加京旗官兵一分共六千五百六十晌援照

盛京章程每地十晌賞給牛犁等項銀十兩共需銀六
千五百六十兩暫在抵補費用積餘項下先行動支

在於前次奏准添補中屯農器動用獲餘銀三萬兩
加展生息三年所得利銀內歸款不動帑項並援照
移駐阿勒楚喀拉林蘇拉滿洲成案每年應派砍伐
蓋房木料兵二百名按各城差務繁簡兵數多寡核
計每年阿勒楚喀拉林派兵一百名輪派吉林兵四
十名伯都訥兵四十名烏拉兵二十名以足二百名
之數至道光二年冬派甯古塔兵五十名三姓兵五
十名均與阿勒楚喀拉林二處官兵會同核計木數
砍伐運交按年以次輪派照數發給鹽菜銀兩各城
出派砍木官四員每員請給鹽菜銀十二兩又奏言

移撥兵丁雖有隨缺地畝乃係隨缺交代若遇老病
事故革退便無容身糊口之處今擬將雙城堡北面
間荒東西展長一百二十七里南北展寬五里挖立
大封堆一百二十七箇分定荒界以備日後退革兵
丁作爲恒產均

允之二年四月復奏曰臣於道光元年具奏籌議雙城堡開

墾屯田移駐京旗閑散一摺自道光四年起每年移
駐二百戶每戶給房四間週圍泥墁院墻一道寬十
一丈長二十丈除派官兵砍伐木植每間給鹽菜銀
二兩外每間工料運腳連墻合銀三十兩又建蓋公

所官兵房屋採買木植在內每間連牆合銀三十五兩由備用銀內動支仍於糶穀價銀及獲餘項下歸款俟奏銷時在備用獲餘項下照例報銷奏蒙

允准在案旋准工部咨開令將每年應建房間數目需用工料銀兩丈尺做法按年造冊題估工竣照例造冊題銷等因咨行前來臣等查例載乾隆三十九年奉

旨新疆一帶修建工程均係撥派兵丁砍伐木植築打土方支給該處耕種所收米麩青稞等項較之採買物料僱覓匠夫者本屬減省今烏魯木齊新建滿兵城房工程既較內地應用銀數有減無浮又何必復照內地之例核算所

有用過銀兩卽著照數准銷毋庸再行交部查核嗣後新疆等處工程派撥兵丁及砍伐木植修建者俱不必照依內地定例核銷欽此又查

盛京養息牧開墾屯田修建官兵住房每間估銷銀一百八十餘兩吉林向辦工程每房一間亦估銷銀四十九兩零此次奏准建蓋移駐京旗閑散居住官房工程派兵砍木修建與新疆等處工程事同一例較定例應用銀數減至倍餘且此項動用銀數仍俟將來墾地各屯丁交納糧石出糶所得穀價銀兩及獲餘銀兩如數歸補原款非開銷正項可比自應比照

新疆之例毋庸題估題銷咨覆工部去後茲准部咨所用銀兩較之內地例價有減無浮自係實在情形但查乾隆三十九年

諭旨係專指新疆而言今未奏明向無辦過成案應由該將軍自行奏明以便辦理等因前來謹查此項工程

臣

詳細籌核節省帑項每間價銀三十兩仍令工員保固十年較前吉林建房准部銷價每間四十九兩仍節省銀十九兩若再題估題銷造冊等項之費無出

臣等應請即照新疆之例毋庸造冊題估題銷

上諭富俊等奏雙城堡建蓋官房請免題報估銷一摺此項

建蓋移駐京旗閑散官房工程前經該將軍奏准由備用銀內動支仍於糶穀價銀及獲餘項下歸款非開銷正項可比著無庸造冊題估題銷別項工程不得援以爲例道光二年六月十六日奉

上諭據松綵奏遵旨查勘雙城堡屯田情形摺內稱雙城堡此次開墾屯田中屯一千丁多係旗丁自行耕種其僱覓民人幫工及分種者二十一戶雖無私行租典之事惟間有在封堆內攜帶家眷者請旨勅禁等語著富俊卽行出示嚴禁以杜民占旗產之漸至另片所奏查勘伯都訥圍場現在封禁設立封堆四百一十個委無民人在內私行

開墾之處並著富俊隨時查察嚴禁私墾無得日久疏懈致滋流弊將此諭令知之欽此尋富俊奏言臣查伯都訥

圍場設立封堆嚴禁私墾並咨伯都訥副都統責成旗民地方官不時嚴查按季結報查核業於本年閏三月奏蒙

聖鑒在案至雙城堡屯田嚴禁民人私典於二十年設立之始卽劄飭該管官嚴查違者撤地追價仍治以應得之罪亦在案茲奉

諭旨欽遵再行分別示禁並嚴飭雙城堡協領詳查屯田界內除僱覓隻身民人作工不禁外如有攜眷居住者

立即驅逐具報仍令每年年底出結以杜私占旗產
之漸惟是

臣

初設雙城堡原係由拉林管轄間荒內

撥出地界南北七十餘里東西一百三十餘里四圍
設立大封堆以別拉林雙城堡兩協領分管界址嗣
因分設左右二屯又將中屯與左右二屯分界各設
立小封堆以別雙城堡三屯佐領分管界址其小封
堆以外大封堆以內間荒仍留作本地官兵及京旗
官兵隨缺地畝之用此項地畝隨缺交代若兵丁老
病事故退革便無容身糊口之處續開北面閒荒東
西展長一百二十七里南北展寬五里挖立大封堆

一百二十七箇以備退革兵丁恒產之用此雙城堡
封堆之形勢也其小封堆以內皆係旗丁之產未便
民人雜處早經逐出屯田界外而大封堆以內先係
拉林管界其嘉慶十五年奏准入丁陳民未便全行
驅逐隨於所居周圍挖界止許墾界內數晌以養身
家不准越占官荒於嘉慶二十年四月內奏蒙

聖鑒又官兵隨缺地畝各有差使不能自種懇

恩賞給農器招佃開墾限三年一律開完於道光元年七月
內奏蒙

諭允各在案入丁陳民此地卽其土著承種隨缺佃戶有家

乃不至欠租潛逃且小封堆以內旗丁旣須僱工大
封堆以內若無民戶一遇農忙添工僱覓於百數十
里以外誰肯遠來相就此小封堆以內斷不可容留
民人而大封堆以內斷不能不容留民人之情形也
但除原有人丁陳民及承隨缺地畝佃戶仍不准增
添一戶此兩項民人如有指地借錢私典等事仍照
前禁撤地歸旗追價入官仍行治罪其誰肯銀地兩
空自罹法網奉

旨知道了欽此十二月復奏言

臣

頃於九月初一日奉

上諭松箴奏調劑雙城堡屯田情形將酌擬各款內先行覆

奏二款請旨遵辦一摺所奏是吉林雙城堡開墾屯田移駐京旗前經松箴查勘情形奏請調劑已降旨令該將軍於到任後將陳奏各條逐加詳覈務期妥善茲據該將軍查明該處中屯地畝已經墾種之地共六千五百餘晌應照六年陞科之例令其納糧惟此項地畝內有因屯丁殘廢病故脫逃另補以致已開復荒續挑之丁到屯未滿六年自未便令其一體完納著該將軍詳細確查其實屆六年者卽著於本年秋收後按晌納糧餘著暫行展緩俟承種屆滿年限再行照辦至修蓋京旗住房原不應預備過多致有閒曠損壞著照該將軍所請先按現願移駐京旗

戶數修蓋住房此外均著緩辦將來京旗續有咨報移駐之戶由戶部知照該將軍再行興工亦不致遲誤松箬接奉此旨卽移知富俊遵照辦理其餘各款松箬到任後仍遵前旨體察情形悉心籌酌務俾屯丁農務移駐京旗兩有裨益方爲盡善將此諭令知之

臣跪讀之下仰見

皇上節用愛人之至意伏查雙城堡移駐京旗閑散砍木修工置辦器具歷經奏明給發過承辦各員銀三萬六千三百四十五兩茲奉

諭旨遵卽劄飭承辦各員去後嗣後雙城堡協領舒精額稟稱中屯屯丁開種地六千五百餘晌查據冊檔已滿

六年者實止地三千六百三十一晌現在按晌徵收
至應修京旗官兵住房十九所計六十七間已修蓋
房五十二間僅止未安門窗暨未修房十五間均各
備料業已遵照停止砍木委員應交四年分房木四
萬餘件未交木七千八百餘件暨五年分房木因本
年水淺未能運到俱經砍伐應置器具鐵木石三項
均已發價製造其應京旗閑散住房二百所計八百
間已修房四十三所計一百六十間已備料三十六
間計一百四十四間現已遵照停工實動用過銀一
萬六千二百六十二兩零臣於打圍回省後復親赴

屯次查驗應徵糧三千六百三十一石業已貯倉已
修房間亦尙堅固當卽分別咨劄阿勒楚喀副都統
雙城堡協領將修成房間及已備物料等項派人小
心看守未經動用銀二萬八十二兩七錢七分二釐
二毫飭令委員等交庫歸款富俊旋補授理藩院尙
書臨行奏言前因中屯屯丁屢經脫逃更補新丁甫
經到屯口糧不接於籌畫屯田節省項下動用修建
養倉九間買穀二千石陸續支借接濟現僅贖存穀
五百餘市石遇青黃不接之時不敷三屯接濟而左
右二屯拉運還交亦屬寫遠又籌畫左右二屯每屯

添建養倉九間置買市石穀三千石中屯義倉連前
舊存穀共存市石穀一千五百石左右二屯共存市
石穀一千石俾資接濟所有設立雙城堡三屯屯丁
共三千名所給窩棚牛條器具及修蓋公所倉廩倒
斃牛價並修京旗住房置買器具等項原奏內均係
按照物價扣合銀數嗣因市價長落不時飭令承辦
各員籌畫妥實委員砍伐房木尺寸不敷之小木估
變價值前後節省銀錢除陸續中屯屯丁冬日入山
砍伐房木買給皮襖三屯窮丁踰冬製給棉衣棉褲
墾地添鐵齒耙犁殘廢病故各丁添給遷費器具中

屯公所添蓋檔房添挖井眼修建牌坊三屯修建養
倉堆撥房置買穀石並孳生乳牛共動用銀一千一
百三十七兩六錢制錢一萬三千四百三十串外共
贖存銀四千一百五十兩制錢一萬二千八十七串
三屯養倉現存穀八千七百五十倉石三屯屯丁分
收孳生乳牛二百四十七隻小牛八十八隻此項錢
糧贖存數目每月戶司立稿將軍副都統公同畫存
孳生牛隻每屯分牧二隻每年孳生小牛除補足二
百四十隻倒斃額數外卽可賞給種地最多之丁以
示鼓勵惟銀錢一項於奏准開銷之外屯丁每有不

時之需日用日少擬發給殷實舖商每月一分生息
以後儘此利息接濟屯丁毋許動用原本以上三項
每任列入交代具奏一次原係籌節之項毋庸報部
以歸簡易奉

旨交新任將軍松霖查明實存數目遵照妥辦務期錢糧不
致短絀屯丁永資接濟欽此松霖到任後以知縣銜實心
傳辦理屯田事宜勸課屯丁認真出力已滿三年奏
請送部引

見

允之松霖籌議由摺節生息項下奏准中屯屯丁窩棚已經

八年均已至閃每年給修費銀三兩三屯養倉各屯
買黑豆五百石按年春借秋還以資接濟畊牛之用
並建蓋京旗住房擬於距屯附近閑荒內建蓋屯丁
京旗各不相擾俾日後人丁蕃衍免生嫌隙飭令屯
丁補修房間並採買黑豆至九月松箴病故原任大
學士松筠補授吉林將軍到任查勘三屯情形奏懇
移駐閑散宗室有月餉地方銀錢漸裕而京旗聞風
知爲樂土再行移駐等因具奏奉

旨交軍機大臣宗人府王公議覆未准行四年各該旗咨報

移駐京旗五十四戶卽照原奏給京旗器具等項預

備妥協先蓋房四十所不敷棲止將已修官兵房十九所內先令居住並查前備料物趕緊修蓋房十四所以便棲止嗣富俊復調任吉林四月到任赴雙城堡奏京旗閑散素未習耕初到必藉屯丁照拂指領易於學習且在在地方均係旗民雜處未見生有嫌隙今屯丁與京旗均係旗人同處更無嫌隙應請仍照原奏在原地基建蓋京旗住房如議行又奏請

敕下各旗將願赴雙城堡閑散務於十月內報齊戶部具奏十一月初卽行知順天府尹直隸總督

盛京吉林將軍凡有應辦事件地方皆得從容料理定

於次年正月初五日以後初十日以前立爲準期凡經過地方皆於未奉咨行以前已得預知其事可以計程籌備庶不致緩急失序先後參差嗣後由戶部應發給每戶治裝銀三十兩俟抵吉林後由備用銀兩項下發給作爲僱覓工價之用各戶得以全獲其利庶可以日冀充裕其荒地五晌各有自僱長工亦可隨時開種至彈壓護送之大臣由京

簡派必須乘郵而來年年往返動勞驛站皆關經費嗣後由東三省年班入

覲回任之將軍副都統內

簡派一二三員順帶彈壓前來伊等係回任之便無須用駟供
給各有隨帶官員足敷照料仍令各該地方官隨同
護送出境至京旗所需車輛此次係四五套大車所
領例價不敷按站爲之津貼關內州縣不過支應一
二站奉省地方官卽有接連數站者吉林竟有應辦
十餘站者久必藉詞賠累虧空且車輛直抵雙城堡
該處非商集處所無貨可載空回小民不無艱窘查
該閑散等每戶大小不過數口行李無多春初地未
融化道路易行嗣後移駐京旗二三口之戶給予蓆
棚二套車一輛三四口之戶給予蓆棚三套車一輛

由京送至山海關由關送至錦州由錦州送至奉省
由奉省送至吉林由吉林送至雙城堡分段遞送相
距皆不過數百里車可祇予例價無庸津貼換車地
方俱係商賈輻輳處所車戶旋時可以載貨不致空
回賠累庶官民均有裨益再本年修蓋京旗住房一
百所其工價係奏定每間用銀三十兩本係撙節佔
計春夏道路泥濘運腳倍增糜費實有支絀情形所
有明年應行修蓋住房百所今冬備料卽於本年領
銀預辦料物可以節省運費少紓工力其六年應蓋
房木亦於今冬派員發給鹽菜銀兩往砍以備明年

河運預爲晒晾候用又京旗沿途飯食此次係官爲預備豐嗇未定成規以後願來者衆多地方官旣難免不以賠累藉口京旗等亦難保必不借端滋事自應立定章程使旗民地方彼此有所遵循嗣後京旗每日早尖各該地方委員每人給制錢五十文晚間住宿卽喫店飯京旗飯食住宿仍爲得所定有章程而地方官照辦亦覺易於從事再一路村落店口無多如百戶前來每站可分二起前後行走不至擁擠店飯備辦亦易奉

旨允之又奏言原奏每兵賞給鹽菜銀八兩砍辦一所房木

柁標椽柱二百一十三件內有長二丈二尺五寸大
柁又有鋸板之檝木以及串排挽運上岸勢不能一
人砍辦必須僱募民人幫做八兩鹽菜實不敷用歷
年均係各城津貼名爲以兵幫兵寔扣兵餉有千例
禁籌議每名再加賞鹽菜銀四兩每年如砍二百所
房木加銀八百兩不動正項請於吉林養倉糶穀價
銀內動用銀一萬兩交商一分生息每年可得利銀
一千二百兩給加添砍木鹽菜銀八百兩仍贖銀四
百兩歸還原款如此砍木卽可從容辦理無詞推卻
並不致再扣兵餉應請立勸懲章程砍木委員知懼

可期不誤修蓋京旗房間砍木委員果於年前照依
尺丈數目砍伐齊全次年八月內交足咨部請給紀
錄二次或雖運到而尺寸不敷除將細小木植入官
罰其照數補砍趕運交納功過相抵如當年不能交
納遲至次年方交者罰俸一年如次年仍不全交者
請降二級留任仍罰俸一年以示懲儆奉

旨允准道光四年三月奉

旨容照等所奏每旗屯適中之地建蓋義學及嚴禁該屯丁
冬令過江樵採俱著富俊妥議具奏富俊覆奏略言吉林
奉省官兵閑散移駐未久京旗閑散初到幼丁無多

暫於中左右三屯公所各建義學三間其該管官亦
易於稽查除中屯前已由邊荒官租錢內動用修蓋
義學三間其左右二屯應建義學各三間亦田地租
錢內撥給錢四百吊以資修建於甲兵屯丁閑散內
擇其通曉清漢文者作爲教習自明年起遞年撥給
三屯束修膏火等項錢各二百吊並責成該協佐領
等嚴查課讀不致日久廢弛至雙城堡西北一帶松
花江北爲蒙古郭爾羅斯地方可覓木柴右屯左翼
四旗去江岸三二十里該屯冬令樵採難保不滋生
事端自應嚴行禁止以杜流弊如有私行過江燕採

者卽照私出邊例治罪奉

旨允准遵飭該屯協領等動用官租錢項修蓋義學選擇教習於次年正月開印後開館課讀中屯兩翼移駐京旗閑散五十四戶每翼四旗擬於京旗閑散內各放總屯達一名副屯達一名以資約束查報滋生戶口遇事赴公所呈報仍照以前奏准三屯設立總屯達之例賞戴金頂每名月給工食銀一兩遇閏增給由覆餘項下動支報銷副屯達不給工食俱如議行十月初五日復奏言臣於八月攜印親詣雙城堡挨屯查勘始到京旗秋成收穫度日光景家家糧草堆積

足敷用度並查原奏中左右三屯屯丁三千名每丁
給地三十晌五年後徵租二十倉石中屯於道光二
年起徵左右二屯於五年起徵道光二年六月原任
將軍松綵奏請雙城堡地畝屯丁種地實屆六年照
現種晌數按晌納糧以紓丁力等因奏准嘉慶二十
三年僅徵收中屯兩翼屯丁等交納倉石穀七千七
百三十餘石本年接丁種地實數核計已滿五年應
徵糧四千七百餘石其左右二屯明年已屆六年交
糧之期若仍照原擬章程納糧是勤苦者多納懶惰
者少輸未免苦樂不均似未平允該丁等竟有多種

少報地數者而遞年核數加增徵糧實屬繁冗亦難
稽核現在屯丁種地七八晌至二十餘晌三十晌不
等連年豐收一晌地至少打糧四五市石交官一倉
石合市石只用四斗已有餘資應請於明年起除交
京旗地畝之丁不納糧外將中左右三屯屯丁無論
現種地畝多寡五六兩年每年每丁納倉石穀十石
合二萬八千餘石至七年按照原擬章程每丁各納
倉石穀二十石以符原議而昭核實奉

旨允之五年二月復奏言

欽差黑龍江將軍祿成甯古塔副都統和福彈壓帶來京旗

閑散七十四戶詢明有與上年移駐京旗係親誼者
使之共居一屯歡聚照應每戶由阿勒楚喀拉林閑
散內先已僱給長工二名預爲燒炕擔水京旗一到
如歸將地畝牛條口糧器具俱照數按戶交領查每
年砍運木植按屯建蓋京旗房間以及戶婚田土詞
訟案件一切公事較前倍增文移絡繹原設兵丁無
多步送公文實形竭蹶請添設一站第應設馬牛草
豆銀兩

國家經費有常未便加增籌議於吉林所屬西北兩路
三十八站內通融抽撤官馬十匹牛一頭連倒斃草

豆銀兩一併撥給仍歸北路站監督管理並據該監督呈報週近各站窮丁內情願移駐雙城堡七戶照各站設筆帖式一員卽於雙城堡協領處辦事貼寫內挑補僅給俸米仍食原餉由北路站外郎內揀放委領催一名外郎一名五年後遇各站領催缺出拔補站設於雙城堡南門外以便牧養於間荒內每站丁撥給地二十晌以資養贍所有站房及站丁每戶房三間以及棚槽鞍轡器具打井等項籌款捐辦不動官項奉

諭旨所辦好依議速行又奏雙城堡移駐京旗章程請於隻

身閑散內量爲變通奉

上諭前據戶部奏移駐京旗章程隻身不准算戶戶前往與調劑窮苦旗人本意未協請將隻身閑散或父子兄弟均係隻身俱統作一戶分別給與房間器具等項通融辦理當交富俊覆議茲據奏隻身閑散一人到屯旣恐舉目無親易致游蕩且每戶應得房間牛具等件亦難減半分給諸多窒礙惟隻身閑散父母子女或伯叔兄弟伯叔父母同住者二三人以上作爲一戶尙屬可行著照所請嗣後京旗隻身閑散內不必拘定有妻室但有父母子女或伯叔兄弟伯叔父母願一同移駐者二三人以上均准算戶

照原定章程給與全分地畝房間牛條器具等項其治裝銀兩仍由吉林給發以資耕種之用欽此又奏准修蓋京旗住房派協領二員分左右翼監修派佐領防禦八員承修一旗五屯如照定式做法於八月內修竣者給予紀錄二次如泥工完竣木工於九月內完者功過相抵如修不合式或院墻未築未鎮牆頂者罰俸一年如至九月底仍修不竣者降一級留任仍罰俸一年如有偷工減料者嚴叅治罪兩翼協領督修於八月內修竣三旗者給予紀錄二次如至九月尙有不齊全者罰俸一年嚴定勸懲章程委員等依限興

修不致有悞戶部覆議道光六年願往移駐京旗共
一百八十九戶內因該處蓋成房屋不敷居住按冊
開出戶止二口現食錢糧之四十一戶歸入七年移
駐外至京旗閑散咸知雙城堡安居樂業願往者日
漸增多若每年限定二百戶移駐必致有裁撤阻其
踴躍之忱著該將軍多派幹練員弁將房門一切廣
爲籌備勿致臨時周章貽悞本年應添佐領驍騎校
等官原議三千戶共設佐領六員驍騎校六員協領
一員此時移駐不至十分之一暫毋庸添佐領著先
設驍騎校二員卽於三次移駐京旗內該將軍秉公

挑選充補俟移駐足五百戶後添設佐領一員卽由
此次挑補之驍騎校內揀選奏請陞補所遺驍騎校
員缺再由移駐內閑散挑補未設立佐領以前驍騎
校仍令三屯佐領兼轄將來移駐足三千戶時再由
該將軍於佐領六員內揀選奏請升補協領一員俾
移駐京旗人等咸知上進有階更爲踴躍所需俸餉
仍照該將軍原議在吉林備用銀內動支其應添領
催二名亦著該將軍於移駐閑散內挑選充補嗣後
移駐京旗皆常年辦理之事不必再令年班來京之
將軍副都統統帶前往每年移駐屆期著直隸總督

於文職道府武職副將參將內每起各遴派一員輪
流沿途護送彈壓照料出關以後著

盛京將軍奉天府尹錦州副都統遞派文武員弁接管
前進所有應給住房車輛及飯食錢文悉照原議章
程隨時給發遵卽分飭照辦六年正月奉

旨富俊籌辦雙城堡移駐屯田事宜妥協周詳現在移駐各
戶安居樂業京旗人等聞信願往者日益增多該將軍經
理其事不避嫌怨盡心宣力著有成效深堪嘉尙富俊著
加恩晉加太子太保宮銜以示朕優獎蓋臣至意欽此二
月移駐京旗閑散到吉派員護送至屯安置妥畢宮

俊復奏言臣於四月初一日攜印赴雙城堡挨屯面
諭京旗各戶咸知感戴

皇恩勤力耕作隨有鑲黃等八旗閑散富珠隆阿等四十二
名呈稱仰蒙

聖恩賞給房屋牛條器具周全地土肥美足可成家立業懇
請行知本旗令伊等父子兄弟戚誼明年卽來團聚
共享樂土等情伏地跪懇除咨行各該旗查辦外復
至中屯公所傳集三次移駐京旗閑散面試清漢文
字馬步騎射秉公選驗有本年移來告退刑部司獄
伯勒克圖五年移來馬甲現充委官德明安均能騎

射識滿漢文字補放驍騎校披甲倭克金佈領催舒
成弓馬嫻熟亦識滿漢文字挑補領催青成分管左
右兩翼仍歸該屯協領佐領等兼轄同日附片奏懇
京旗陸續移來二百七十戶分撥中屯兩翼四十屯
居住計一總屯達經管二十屯道路紆遠勢難兼顧
雖有副屯達並無頂戴工食徒有差使毫無鼓勵遇
事每多退縮不前請照原設中左右三屯每旗五屯
放總屯達一名副屯達一名之例由京旗閑散內再
添總屯達六名副屯達六名連前共合八名分管八
旗其總屯達請賞戴金頂每名月給工食銀一兩計

添六名每年共應添工食銀七十二兩遇閏加增仍
由積餘項下動支年終報銷其副屯達亦請賞戴虛
銜金頂不給工食與總屯達一體稽查戶口呈報事
件移來京旗閑散多係赤貧且不諳耕種初到此地
基業未立不免拮据請援照拉林阿勒楚喀閑散滿
洲之例每年十二月內每名賞錢十二吊以爲粘補
農器衣服之用每名只給五年以後各習慣種地毋
庸再給嗣後陸續裁減此內鰥寡孤獨尤爲堪憫亦
請照拉林阿勒楚喀閑散滿洲每名月給銀五錢之
例按名每月給錢一吊二百此項賞錢請由吉林稅

銀項下動用銀三萬兩連前奏准粘補三屯屯丁農器交商生息獲餘銀二萬兩共五萬兩交吉林同知擇殷實鋪商一分生息計每年應得利銀六千兩足敷應用再商民納利惟恐平頭銀色不便請按市價交錢具奏奉

旨允准遵卽發給同知銀兩交商生息得利備賞京旗閑散以資接濟後接准戶部知照道光七年願來京旗戶數卽派文武員弁於二月初旬赴威遠堡界接到京旗八十五戶詢明凡係父兄子弟親誼安置一屯以便互相照料耕作隨將伊等應得房地牛條一切器

具數目刷印執照各給一紙到屯照數檢收發給三屯六八力弓各三張交協領佐領按季操演不廢騎射兵農並重度土開荒至此而經營大備矣

伯都訥屯田

道光元年十二月將軍富俊籌開伯都訥屯田以備

移駐京旗蘇拉奏言

臣

伏查伯都訥空閒圍場既無

林木又無牲畜寔可墾地二十餘萬晌挖記封堆因國家經費有常請俟雙城堡屯田徵租後再行開墾業於嘉慶二十三四年先後繪圖進呈奏蒙

允准在案道光二年已屆中屯徵租之期伯都訥屯田自應

遵照前奏接辦惟是嘉慶十九年臣等初辦屯田未能洞悉情形奏明不准民人代種恐其設法租典據爲已有是以恭奉

諭旨若仍令僱人代墾或將地畝私行租佃久之悉爲流民佔據將來移種旗人時無地可耕則該將軍等辦理不善咎有攸歸斷不寬恕等因欽此嗣因旗丁一人竭力耕耘一年只能種地十晌不能不僱覓幫丁助耕現在辦有成規均各安業計雙城堡三屯前後撥移吉林奉天無業旗丁三千戶男婦大小已萬餘人此外率皆有地可耕及家有當差食餉之人生計旣裕誰肯輕

去其鄉此項屯田若仍令旗人開墾恐各該處勉強撥派多致潛逃轉於旗務屯田無益莫若招民開墾成功較易若慮民人典買旗產亦在申明例禁辦理得宜擬請查照設立雙城堡章程應募民丁每人給領地三十大晌四人聯名互保不准轉租典賣違者兩造治罪撤地追價入官另行招佃給領自認領之年起第六年每晌納租制錢三百文小租錢三十文既省建倉貯穀輾轉出糶十數年後積租漸多即可備移駐京旗之用京旗蘇拉到日交出熟地二十大晌免其納租不准旗人典賣與民違者兩造治罪撤

地仍給旗人如此立法誰肯空費銀錢違例典賣餘地十大晌卽給領地民人作爲己產每晌仍徵租制錢三百文給與印結執業並聽其典賣照例稅契過糧此項民戶農具一切皆所自有遷費亦可無庸惟曠野之地應預蓋房鑿井未免拮据並請照雙城堡章程每丁賞給蓋窩棚銀四兩三十戶爲一屯每屯官爲打井二眼以備偶有坍塌缺水並京旗到日足用每井給銀十八兩計每丁共合用銀五兩二錢在備用項下支領起租之年地三十晌每丁合納制錢九吊一年歸款尙有數餘較前旗丁每人用銀四十

七兩所省寔多如有附近旗人願充屯丁悉照民人
一例辦理此項地畝僅離伯都訥城百餘里設立保
甲稽查彈壓所有詞訟以及升科徵租各事宜均交
伯都訥副都統督率伯都訥理事同知妥爲經理將
來招集民衆或須添官及移駐京旗蘇拉之時設官
蓋房再行仿照雙城堡章程具奏遵辦奉

硃批著伯麟英和黃鉞文孚汪廷珍妥議具奏欽此尋伯麟

等奏言臣等查伯都訥屯田先於二十三年議及其

地舊名圍場實無山樹牲畜可供採捕因其時方辦
理雙城堡開墾事宜未能兼辦現在左右二屯屯丁

已於二十五年到齊中屯明年已屆陞科則該處屯墾事宜正可接續辦理伏思食爲民天治土殖穀寔仁政之首務今伯都訥圍場可得地二十餘萬晌計尋常之年每晌可足三數人之食豐年則過之是其地開墾後每年可益數十萬人之食若任其荒廢寔爲可惜惟地土較廣人力惟艱從前開墾雙城堡時窩棚牛具盤費等項用帑至十七八萬兩其到屯之丁尙有潛逃者且每丁給地三十晌數年之久中屯已屆升科僅墾地二十晌未墾者尙三之一是其地多丁少可知今伯都訥之地爲數更多若照雙城堡

挑派旗人開墾不特興帑浩繁其各城閑散願墾者
經雙城堡挑選後計難續派嘉慶五年甯古塔旗人
承種官地二萬七千餘畝拋荒至一萬九千餘畝不
得已改撥民人耕種此次需丁至五千戶勢難猝辦
是以富俊等有變通之請查吉林伯都訥一帶本有
民地一百四十三萬八千二百餘畝歲徵田賦丁賦
米折等銀八萬五千餘兩歷久相安此次所墾之地
富俊於二十三年初奏卽稱界在民地之中因舊有
圍場之名是以未經開墾則招募民人自屬較易惟
民墾與丁墾其事不同此次開墾屯田原爲移駐京

旗閑散使之爾田爾宅來止如歸設令墾成後民人
竟佔爲己業至移駐時轉至無地可耕自當熟慮今
富俊等以其地三分之二留備移駐其一給原墾之
人定立章程先有成約旣非僱令代墾亦非私相租
佃諒可不致公然佔據其所給窩棚開井之項每地
三十晌合給銀五兩二錢以視雙城堡用項減去十
之八九於帑項寔大爲節省其摺內稱附近旗人有
願墾者卽照民人一例辦理是亦非專歸民墾富俊
等特爲敏於成功儉於經費起見自應准其招募民
人與附近旗人一同開墾惟移駐非旦夕之事卽如

本年正月富俊所奏每年移駐二百戶則雙城堡移駐三千戶已需十五年且預擬之事每難定准則伯都訥移駐至早亦需二三十年之久此時事經創始必籌計萬全庶日後可以相安於無事查富俊等所定開墾升科撤地章程大約依仿雙城堡然旣係募民開墾則情事迥殊辦理豈能一例雙城堡屯丁本係旗人與在京閑散並無二致一經移駐便可相安此次募用民人就現在與附近旗人同屯共處已恐不能相安將來移駐後若如所議每屯京旗三十戶民人三十戶旗民雜處必多不便宜酌者一雙城堡

屯丁本在旗籍其就挑者必於願墾之中擇其力可
勝任者到屯之後或有潛逃卽爲另挑足額勢可整
齊加以官貼用項稍待地有花息卽可接濟墾荒民
人其力有限又牛具一切皆所自備今亦照雙城堡
章程各給與地三十晌查奉天一帶謂一日可犁之
地爲一晌計地六畝吉林每晌約有十畝謂之大晌
三十大晌得地三頃非殷實莊農牛驢廝養與婦子
並耕不能栽種收穫若一丁承受無論開荒卽每歲
翻犁播種亦不能徧今應募民人貧戶居多其殷富
有力之家孰肯輕去其鄉遷地作苦且一時招募至

五六千戶更難其選該民人到屯之後力有不逮或
僅墾二三晌以充口食及升科之時交租不前必多
逃亡宜酌者二雙城堡升科後每丁交三十晌之租
制錢六千文其十晌爲原丁已產不徵其租是移駐
京旗之地存者免稅之產其事易從此次因係民墾
議以升科後每三十晌徵制錢九千文通以每晌三
百文爲則是官地私地有何分別事隔二三十年習
爲故常移駐時忽撤其三分之二深恐有費周章現
在開墾之初每三晌內官地兩晌私地一晌其名似
應早定及升科時官地與私地之租更應有別官地

租輕則小民利其所有撤地愈艱私地租重則將來
撤地後原墾之戶產少人多漸形拮据徵科不易宜
酌者三升科以後至移駐以前爲時旣久其間屯民
家計之貧富生齒之息耗變遷不一原墾之戶或有
無力無人承種者自所常有若聽其私行改佃必致
暗出頂手錢文輾轉滋弊久之竟成私產若不准改
佃又恐已熟之土復致拋荒且或有貧苦疾病孤寡
無依者聽其流離失所亦在可憫似應酌定改佃之
例各令報官辦理宜酌者四

諭曰伯麟等會議開墾伯都訥屯田一摺伯都訥圍場經富

俊親勘可墾地二十餘萬畝該處旗人經雙城堡屯田挑派之後一時難於續派則莫若與附近旗人一同認墾自屬成功較易惟此項地畝原爲移駐在京旗人而設將來移駐之後各分經界必須早爲規畫使旗民彼此相安惟未經移駐以前墾荒升科改佃名事宜自當妥爲籌計俾目前便於集事日久具有成規方足以共享樂利伯麟等所議應酌四條皆爲事理之所有富俊於此事身親目擊自當稔悉利弊著再行確查審思熟計妥議章程具奏富俊覆陳謂吉林省屬界暨伯都訥阿勒楚喀等處多係旗民同屯共處

盛京通省皆然卽近京旗人下屯種地亦係與民人錯處從無不便之處且京旗閒散多不習耕惟與民人同屯共處初到正可與原種地之民人講求耕種夥種分糧久之耳濡目染習慣自然必皆務農立業該民人於撤地後若有餘地卽可與旗人傭工寔旗民兩有裨益所有臣等前奏每屯京旗三十戶之處似可毋庸另議又雙城堡初立屯田臣等未能深悉情形每丁給地三十晌責令開墾二十晌丁戶旣多良莠不齊怠惰不能力作者間有潛逃臣等續行挑補之時均擇其有子弟作爲幫丁者方准赴屯其續補

有幫丁之戶自無潛逃之事此次招民墾荒名雖一
丁亦必有眷屬親族現在奉天前來雙城堡旗丁一
名親丁數口間有數十口者自可幫種或乃僱短工
耘耨若果孤身一人翻犁播種自非所能也應募之
民農具一切皆所自備貧戶斷難承領查伯都訥阿
勒楚喀等處丁民地有定額孳育無窮是以蒙古科
爾沁招民墾地竟有成千累百先付壓租銀兩願領
荒地之事此_臣本年奉

命出邊查辦所親見者諒殷富有力之家認墾不至乏人至
一時招募五六千戶原難期必移駐京旗閑散亦非

一時畢集臣等前奏陸續招募已爲聲明每年招佃

若干戶於年底彙奏一次在案所有臣等前奏每戶

給地三十大晌之處似可毋庸另議惟民人到屯或

僅墾二三晌以充口食及升科之時交租不前恐多

逃亡一節原爲可慮計自領地以至升科六年之久

若平日不課其開地多寡直至升科之年責令交租

其地少者不敷交租勢必逃亡應飭承辦之員自領

地起每年秋後查核每名墾地若干晌造具花名清

冊具報一次如有逆計交租之年不能全墾者卽行

逐佃撤地奪房另招另招之戶臨時核計已開熟地

若干晌酌量展其升科年限仍取其領地升科甘結
備查又吉林旗人原准報開官荒向不納糧且初次
派撥雙城堡旗丁給荒三十晌原止責令開熟地二
十晌是以臣等前議第令納熟地二十晌租二十倉
石撤交京旗閑散地二十晌其十晌作爲已產不徵
其租至民人種地必須價買各直省民人並無不徵
錢糧之例吉林民人升科新地每晌徵銀八分米四
合零計一晌卽合銀八錢且有米糧臣等此次奏請
招民墾地再三熟商私田十晌旣已無庸價買又每

晌止徵制錢三百已屬減之又減徵科斷不至於拮

據至官田地租似應加重俾民人無利可圖將來撤地自易但民人無利可圖恐此時卽不肯認領此地原爲移駐京旗閑散預墾熟地起見旣用其力不得不予之以利是以官徵錢亦以三百爲則若係勤儉農民迨移駐京旗撤地之時積穀變價已有餘儲撤地後所有伯都訥孤榆樹一帶附近民地儘可價買自耕若係人口衆多費用浩大者撤地後民人原與旗人不同餘丁自可貿易或卽與旗人傭耕均可毋虞失所

臣

等前奏六年升科每晌徵租制錢三百移

駐京旗閑散到日撤出地二十晌免其徵租已產十

晌每晌仍徵錢三百之處似可毋庸另議惟自徵租
日起至移駐京旗閒散時事隔多年現在開墾之初
每三晌內官地二晌私地一晌其名自應早定

臣等

前奏撤交京旗閒散地畝後餘地十晌給與執照作
爲已產之處應改爲領地日取具領種荒地三十晌
第六年起租每晌制錢三百俟移駐京旗閒散時交
出熟地二十晌其餘十晌作爲已產仍照每晌制錢
三百文交租並聯名互保甘結此內如有旗人認領
者第六年止納官地租制錢六千私地十晌照雙城
堡章程免其納租並取結保存案俟交出官地時其

私地十畝作爲已產均於執照內註明發給民人交官地後私地聽其典賣旗人仍照定例不准典賣與民如此立定章程預爲明示撤地時自可不費周章矣再查

盛京餘租地畝無力承種者報官退地另行招佃此項屯田自應仿照辦理如有官地私行改佃暗出頂手錢文者查出追價入官撤地另佃並失察之該管官一併議處至招民足額後五六千戶其貧苦疾病孤寡者自所不免其領地時因親及親必有同族至戚自難膜視如實係無依者責成地方官照收養孤老

例辦理疏入報

聞二年正月二十七日奉

上諭前據富俊等覆奏伯都訥屯田各款一摺當交曹振鏞等會議具奏茲據奏稱開墾屯田專爲移駐京旗閒散而設上年富俊奏定雙城堡章程經各都統等曉諭八旗迄今已逾一年願移者僅二十八戶恐十五年内移駐三千戶必有屆期展限之事所蓋住房卽不免先有間曠伯都訥移駐閒散又在道光十八年以後計日尙遙其所需經費不能不預籌墊借是否亟應籌辦應請欽派大臣前往查勘等語雙城堡屯田計可移駐京旗閒散三千戶今願

移者僅二十八戶人情不甚踴躍並同時開墾伯都訥屯田爲計太早且經費亦恐不敷所有伯都訥屯田一事毋庸派員查勘著富俊卽行停止籌辦並飭令文武員弁嚴禁民人私墾現在祇須專將雙城堡屯田妥爲經理以期經久無弊至該將軍原議砍木備料自道光三年爲始修蓋住房八百間以後每年蓋房八百間今旗人旣觀望不前其多蓋房屋誠恐徒滋糜費著俟道光四年移駐時計若干戶著有成效再行酌量情形核實辦理富俊覆奏曰

雙城堡移駐京旗仰蒙

皇上賞給地畝房屋牛條籽種口糧一切器具全備京旗閒

散到此是無家而有家無業而有業較其賃房居住窮苦逼迫不堪情形何啻天淵揆之情理當必願來者多去年所報願來之戶甚少或因_臣前奏賞銀及本旗公幫銀兩禁止私債勒扣計來雙城堡尙有二年之久一經呈報願來則無人通融緩急是以遲遲亦未可定至修蓋住房八百間_臣原奏道光二年砍木三年蓋房及旋任後詢之十旗協領參領僉云必須元年秋冬砍木冬日趁雪爬犁拉至河岸於二年

桃花水或夏日水旺運至金錢屯等處登岸陸運工

所鋸解晒涼三年蓋房方能堅固不至翹裂_臣等隨

飭照辦砍取四五兩年木植茲蒙

訓諭

臣

暫將應砍六年蓋房木植停止俟道光四年移駐時計若干戶再行核實遵辦外至開墾伯都訥屯田自應遵

諭停止第

臣

等愚見不獨爲移駐京旗天地自然之利蕪棄可惜前次原議大學士伯麟等亦曾言之食爲民天治土殖穀寔仁政之首務今伯都訥圍場可得地二十餘萬晌計尋常之年每晌可足三數人之食豐年則過之是其地開墾後每年可益數十萬人之食茲任其荒廢實爲可惜等語此次大學士曹振鏞等議

及於墊借經費卽以經費而言每丁用銀五兩二錢
起租之年每丁納制錢九十二年歸款尙有數餘卽
以籌款而言亦不過借墊五年不致懸宕且亦不能
二十萬晌一時齊墊爲款無多尙易籌備臣等詳核
該處荒地二十餘萬晌計可安二百餘屯姑以十屯
言之每屯三十屯計三百戶每戶給蓋窩棚銀四兩
共用銀一千二百兩每屯打井二眼十屯共打井二
十眼每眼井工價銀十八兩共用銀三百六十兩二
項共用銀一千五百六十兩第六年升科每晌地徵
制錢三百文九千晌共徵制錢二千七百串每兩銀

以制錢一串一百合銀二千四百五十四兩零除歸
還原款銀一千五百六十兩外仍贖銀八百九十四
兩以後每年得租制錢二千七百串計地二十餘萬
畝將來開地多得租愈多於經費亦不無稍裨且係
招集民人毫無抑勒較銀米並徵民地徵租本輕風
聞小民願認領者不少一旦著有成效無論年月久
近隨時移駐京旗閒散裕如也奉

硃批吉林乃我朝發祥根本之地一旦招集無數民人不知
其意何居且聚之易而散之難其理易見卽如所言隨時
移駐京旗閒散裕如也但此項民人日久安居又將何以

措置可再明白回奏欽此三月富俊覆奏曰伏查八旗生齒日繁生計爲艱久廛

列祖聖念凡爲旗人資生計者無不委曲備至

恩養如此其厚而旗人之窮乏未見從容不使之自爲養而常欲以官養之此勢有不能者也溯查乾隆年間戶部侍郎梁詩正御史舒赫德等條陳八旗籌立恆產惟有沿邊屯田一法蓋養人之道在乎因天地自然之利而利之必使人自爲養斯可以無不養也若按人給衣給食雖一州一縣尙不能徧况八旗之衆乎長思熟計惟使不聚於一方

盛京甯古塔爲我

朝興隆之地閑曠地多槩可開墾八旗滿洲似不妨遷移
居住廣募民人開墾等情有案彼時臣工卽慮及此
今已隔數十年旗人生育益多可知臣之愚見常思
八旗生計必須調劑分置使自爲養嘉慶十九年仰
蒙

仁宗睿皇帝聖恩調任吉林將軍因查舊卷有陞任將軍賽
冲阿等具奏摺內奉

旨該處收成不豐此時原不能卽將旗人移駐其一切墾荒
計畝章程則須預爲籌辦不必延至二三年後推諉時日

著該將軍等檢查乾隆年間移駐舊案將先期試墾備辦
各事宜詳細酌核先行籌議章程具奏

臣

遂親勘荒地詳

議章程陸續具奏設立雙城堡三屯派移吉林

盛京旗人三千戶屯種辦有成效因查伯都訥圍場荒
地亦係肥美天地自然之利可資旗人萬年之養與
其使之就蕪何若墾之爲田第吉林旗人原准報開
官荒向不納租其無地者已派赴雙城堡一千數百
戶再無領赴伯都訥開墾之人始議奏請招募民人
認墾查吉林現有納丁納糧民二萬九千二百九十
八戶伯都訥現有納丁納糧民一萬四千四百二十

八戶阿勒楚喀納丁民三千零七十三丁此等民戶安居已久滋生不少地不敷種亦冀認墾荒地併不招集流民緣查民情有地有產孰肯輕去其鄉卽赴各處飄流均係無業貧窮之人今認墾荒地牛具籽種農器均係自備流民勢所不能認領至招墾章程

臣等必將每人准領地三十六晌第六年升科每晌地徵制錢三百文俟移駐京旗閒散到日交京旗地二十晌其餘十晌作爲已產仍按晌數納租明白宣示其願認領者併將前情於發給執照內註明方丈給地畝併無絲毫抑勒孟子云百畝之田勿奪其時

八口之家可以無饑矣丁民既交京旗地畝之後仍有田十晌卽係百畝可無流散之虞且隨便貿易營生及傭工力作不致失所尙不必另籌安置况旗人多不善於隴畝各有民佃一人夥種習耕亦屬有益計領地民每人給蓋窩棚銀四兩夥打井銀一兩二錢共用銀五兩二錢第六年升科每丁納制錢九千歸還原款卽有敷餘以後每年徵租制錢九吊此係一丁之地三十晌共計地有二十萬餘晌以此推之每年徵租不少積十數年後遇有移駐京旗閒散費用可期裕如臣等原爲預籌日後旗人久遠生計起

見是以奏請開此荒地且世受

聖恩深重不敢以

國計民生之事膜視不言自圖省心安逸其餘各款前三摺內俱已聲明謹此據實明白回奏閏三月初二日

諭曰據富俊等明白回奏開墾伯都訥屯田情形一摺吉林乃我朝根本之地若因伯都訥開墾屯田招集流民耕種日久流弊不可勝言今該將軍等覆奏原議係由吉林現有納丁納糧民人認墾並非招集流民將來不必另籌安置於事尙無窒礙惟現在雙城堡屯田尙未墾竣且移駐

京旗甚少何必亟亟籌辦俟將雙城堡辦竣獲有成效再行議及開墾亦未爲遲將此諭令知之富俊遵

旨停辦於道光四年十一月始奏奉

諭旨遂咨行伯都訥副都統等衙門出示曉諭招墾派員丈量分屯申畫經界名其地爲新城屯以道光五年爲始分八旗兩翼每旗立二十五屯每屯各設三十戶以治本於農務滋稼穡八箇字爲號每一字各編爲二十五號共計二百屯初報之戶積至三十戶爲治字第一號卽令歸入鑲黃旗頭屯撥給地段墾種續報再積至三十戶爲本字第一號歸入正黃旗頭屯

以後依號按旗挨撥周而復始八旗地界可以同時
並墾五年已認佃一千一百二十七戶按八旗分撥
四十三屯嗣復勘丈新城屯閒荒僅敷一百二十屯
卽將五年所招佃戶分撥字號均改每旗十五號六
年認佃九百十七戶分撥三十一屯七年認佃一千
五百五十六戶分撥四十六屯前後總計一百二十
屯星羅基布與雙城堡相爲表裏旗無徵糧民有恆
產所以爲旗人萬世計者至矣故備錄之爲後法焉